


MASA KE BASIKA NTANGU

NIONSO NA DITADI

 Beto ke vutula matondo na suka yayi samu na Mvwandulu ya Mfumu Nzambi, yina me banda na beto na balukutakanu ya ntete na kupesaka beto nsangu mosi, ti—ti beto fwana “kuwa, kuvwanda na luzitu” na ntswala ya Yandi, ti Yandi kele na kima mosi ya kutuba na beto. Mu ke kwikila ti Yandi ke sala yina Yandi silaka. Yandi ke zitisaka ntangu nionso Ndinga ya Yandi. Mpe na yina beto ke vutula matondo na kuvukana kintwadi, ya moyo, mpe na lweka yayi ya Seko na suka yayi, mpe kuvwanda na kiyeka ya kusambila Mfumu diaka, mpe kuvukana beto mosi kintwadi mpe kuwidila Yandi. Yawu yina beto me kwisa kintwadi, ya kele samu na lukanu yayi ya kieleka.

² Ntangu yayi, mu me mona ti mu me baka na kingolo-ngolo Mpangi Neville, na kintulumukina, bubu yayi, samu na mwa ndosi mosi mu kuzwaka. Ti . . . Mu ke kwikilaka na . . . Mu . . . na bandosi. Mu ke kwikilaka ti Nzambi ke salaka na bantu na nzila ya bandosi. Mpe mu kuzwaka ndosi mosi ya ngitukulu, mazusi na nokila. Ti, mu vwandaka kwenda na lweka ya kiwanda, mwa lweka ya kiwanda mosi, mu vwandaka kwenda na kisika ya kudia kisika mu zolaka kuzwa madia ya munu—ya munu ya midi. Mpe mu monaka ti, mutindu mu kumaka pene-pene ya kisika yango, ba vwandaka bula musiki, orchestre mosi vwandaka bula musiki, na ba-violon, mpe bawu vwandaka sakisa bantu na yina bawu vwandaka kudia. Mpe ya vwandaka na kima mosi na yawu yina mu zolaka ve, na yina mu lutaka kaka na lweka ya kima yango. Mpe mu kutanaka na muntu mosi vwandaka mata na mongo. Mpe mu talaka, mpe bantu mingi vwandaka kwisa na mongo na kisika yango ya madia. Kasi mu monaka ti mu kwendaka ntama ya bawu, mu balukaka na diboko ya kibakala, to, na diboko ya kikento.

³ Mpe na kutala, kuna na kiwanda, mu lendaka mona tabernacle. Mu kuwaka ndinga ya muntu mosi, kutuba, “Kutana na Mpangi Branham na mpioka kingandi. Yandi ke kulumuka na mongo kuna na zulu. Mpe tuba na yandi diambu kingandi.” Mpe mu salaka nswalu samu na kukuma na mpioka yayi.

⁴ Mpe ntangu muntu yango kumaka, ya vwandaka Mpangi Neville yina vwandaka me lwata kazaka ya yandi ya ntinta ya café, ya vwandaka kaka mutindu yandi ke monana ya kuvwanda kuna na suka yayi. Mpe yandi tubaka, “Mpangi Branham, kana nge ke vwanda na mbanza,” yandi tubaka, “ya lendaka vwanda kima ya mbote samu na nge na kukwisa, samu ti Mpangi

Hank . . .” Ntangu yayi, mosi kaka mu zaba, Mpangi Hank, kele Mpangi Henry Carlson, beto ke bokilaka yandi Hank. Yandi tubaka, “Yandi lendaka banza ti ya kele ngitukulu ti nge ke kwiza tala diaka ve tabernacle ntangu nge kele na kizunga ya mbanza, to na kizunga ya mbanza mwa bilumbu fioti.” Mu me vumbuka.

⁵ Mpe, na yina, mu kuwaka mutindu mosi ya ngitukulu. Mu zolaka ve kukota na kisalu na ntangu yina ya sabala, tii mu lombaka na Mpangi Neville kana yandi vwandaka na kima mosi ya mfunu samu na suka yayi, samu na dibuundu. Na yina yandi me vwanda mbote, mutindu ntangu nionso, yandi tubaka, “Kwiza.” Na yina, beto kwisaka kaka. Mu bokilaka yandi na manima ya ntangu mazono na manima ya midi, mpe me kwisa na suka yayi, kukondwa kuzabisa mosi ya beto.

⁶ Ntangu yayi mu ke kwikila ti ya zolaka vwanda diambu ya mbote, ntete, samu na munu kaka mutindu ya ku—kutendula na beno mwa bima. Mu kele, na kubanza, muntu mosi ya ngitukulu samu na bantu mingi. Mpe mu kele mutindu ya ngitukulu samu na munu, mpe. Samu, mu ke meka na kulanda lutwadusu ya Mpeve-Santu, kaka pene-pene mutindu mu lenda. Mpe yina ke sala beto ya ngitukulu, beno me mona. Beto ke salaka mambu ti beto—beto ke kuvwanda kieleka mpe beto ke kukiyufula bantangu yankaka, “Samu na yinki mu ke sala diambu yayi? Wapi mutindu mu me sala diambu ya mutindu yayi?” Mpe kaka na ntangu yina beno lenda banza ti beno me sala kieleka yina beno lendaka ve kusala. Kasi kana beno ke vwanda kaka na mvibudulu, mpe kuvwanda na lukwikilu, mpe beno kele kieleka ti Nzambi me twadisa beno na kusala yawu, beno ke mona ti ya ke sala kaka kieleka na mutindu ya kusungama. Beno me mona? Mpe na bantangu mingi beto ke mona yawu. Mpe mu zaba ti Mpangi Neville me monaka yawu, bantangu mingi. Mpe bantwadisi mpe bantu ya kimpeve me bakula yawu.

⁷ Ya vwandaka mwa ntangu mosi na luzingu ya munu ti . . . Ya kieleka, kubanda mu vwandaka kaka mwana-bakala ya ntwenia, mu me kuwaka ata fioti ve lutwadusu ya kieleka ti mu lendaka zinga na—na Jeffersonville. Ya ke vwandaka ntangu nionso diambu mosi ya mpasi, samu na munu na kuzinga awa. Kisika ya ntete, nsungi na mpasi ke wisana na munu. Kima yankaka, kuna ya ke monana ti ya kele na mpeve ya kidi-kidi.

⁸ Kana beno vutuka na manima mpe beno tala kisika mosi awa, kana ya bebisamaka ve na ntangu ya kifuluka ya masa, ya kele na mukanda mosi samu na diambu yina, yina mu vwandaka na yawu, lubokilu ya ntete na ministere, mu bandaka na kukwenda. Mpe Mpangi George DeArk na munu . . .

⁹ Mpe mama ya Mpangi Graham Snelling, Mpangi Hawkins yina ke twadisaka station service na New Albany, mpe bantu mingi, kutanaka na munu na nganda ya mwa kisika ya

lukutakanu ya bisambu awa. Mpe tubaka mpe, kana mu zolaka vwanda, ba zolaka katula na mbongo ya bana ya bawu ya kudia, samu na—na kutunga tabernacle, na yina ba zolaka ve kunata bawu sika na sika.

¹⁰ Ntangu mu kuwaka mama yina ya fioti, me simba bébé mosi na diboko ya yandi mpe yina yankaka na digembo ya yandi, yandi tubaka ti yandi vwandaka zola kukatula na mbongo ya bana ya yandi kudia, samu na kutunga kisika yina ba lendaka vwanda mpe kusambila, ya vwandaka fioti mpasi samu na munu na kutelama. Na yina Mpangi George mpe munu vukanaka kintwadi mpe bakaka lukanu ti beto lendaka vwanda mpe kutunga tabernacle.

¹¹ Mpe ntangu tabernacle tungamaka, ya monanaka ntangu nionso. . . Na suka yina mu biekaka tabernacle, vision mosi kwisaka, yina kele ya kusonama mpe ya kele na ditadi ya nsongi kuna, na yina Mpeve-Santu tubaka na munu, “Yayi kele ve tabernacle ya nge.” Beno me mona? Mpe mu yufulaka wapi sika tabernacle ya munu vwandaka, mpe Yandi nataka munu na nsi ya mazulu ya bleu yina ke semaka. Mpe na yina Yandi tubaka, “Sala kisalu ya évangéliste,” mpe nionso yina, mutindu beno me zaba. Ya kele ya kusonama mpe na kati ya babuku.

¹² Bima yina nionso yango ya kutula kintwadi. Mpe kilumbu mosi ntangu mu vwandaka zenga matiti na lupangu kuna kisika Mpangi Wood ke zinga ntangu yayi, mpe bokilo ya munu ya kento vwandaka zinga kuna na ntangu yina; mu vwandaka na zulu ya kimatinu yina ya manima, mwa kimatinu mosi ya ntama ya béton, yina mu tungaka mwa kisika yayi kuna samu na bokilo ya munu ya kento. Mpe yandi vwandaka mutindu mukengi ya yinzo-Nzambi na ntangu yina, vwandaka keba na yawu. Mpe kaka na mutindu ya kieleka muntu nionso lendaka tuba, Ndinga mosi tubaka na munu, ya tubaka, “Mu lenda ata fioti ve kusakumuna nge kana nge bikala awa. Nge fwana kabwana na bantu ya nge mpe kisika yayi.” Mbote, munu, yina panzaka munu bitini-bitini, pene ya sabala mosi to kulutila.

¹³ Bambala mingi, na ntangu nionso, Kima mosi vwandaka tuba na munu, “Kwenda, kwenda. Kwenda na wesete. Landila kukwenda na wesete.” Mbote, munu. . . Ya ke yangisaka munu ntangu nionso. Mpe ya ke monana mutindu ntangu nionso. . .

¹⁴ Ntangu yayi, mu tulaka yawu kieleka na mabanza ya munu ti na sabala yayi mu ke kwenda na Tucson, kisika mu ke futa kisika mosi, kuvwanda kuna na hiver yayi; kunata bana na lukolo, yina ke banda na Ngonda ya yivwa. Mu vwandaka na kisika. Ya vwandaka mpe kisika ba pesaka munu kuna. Kasi ya kele na kima mosi yina. . . Mpe—mpe kana mu me kwenda. . .

¹⁵ Kima yankaka mu ke zola kutuba. Kaka na ntwala beto tunga yinzo yayi na zulu awa, yinzo ya pasteur, kisika ya kele ntangu yayi, mu zolaka ve kutunga kuna. Mama ya kento ya

munu vwandaka kiboba. Mpe yandi dilaka mpe samu na yawu, yandi tubaka, “Mu ke bika ve mama awa, na kuzabaka ti yandi kele kiboba, mpe yandi lendaka vwanda ve na lukengolo.” Mbote, mu bakulaka yawu. Mu me bakula. Ya kele mama ya yandi, mpe mama mosi kaka ya vwandaka na yandi, to ya zolaka vwanda na yandi. Na yina, mu bakulaka yawu. Na yina mu—mu sambilaka Mfumu, mu tubaka, “Mfumu, ya ke monana ti mu ke zola ve kisika yango,” mu tubaka, “sepelisa munu. Mu ke kwenda kisika nionso Nge ke zola ti mu kwenda, na bisika nionso. Kasi mu ke zola ve kuniongisa kento ya munu, samu na kukatula yandi awa, samu na kwenda na yinsi ya nzenza kisika yandi me zaba muntu mosi ve. Mpe na yina mu me kwenda ntangu nionso, na mutindu nionso. Sepelisa munu kaka na kuvwanda awa na yandi.”

¹⁶ Mpe ntangu yayi, ntangu ba bakaka mama ya yandi, mpe yandi me kwenda na Nkembo, na manima tala diaka nsatu, beno me mona, ntangu yayi samu na kukwenda na ntwala. Mu zaba ve yinki kusala.

¹⁷ Mpe na manima kilumbu yankaka yina ntangu malongi yayi yina bampangi kubandaka na kizunga, mu telemaka na chaire kilumbu ya nsuka yina mu vwandaka awa mpe mu tubaka na beno ti mu ke vwanda ve na kilanga ya kulonga ntangu nionso ya vwandaka salama. Na yina, bampangi na mulemvo nionso sungikaka nionso yina. Yawu nionso me kuma pwelele. Na bangunga makumi zole na yiya, yawu nionso vwandaka me manisa.

¹⁸ Ntangu yayi yina me zibula diaka kilanga ya kulonga samu na munu. Mu me zaba ve yinki kusala. Mu me zaba ve yinki nzila kubaluka. Mu lombaka Mfumu vision mosi. Mu lombaka Yandi na kutuba na munu yinki kusala. Kasi Yandi bikaka kaka munu kuvwanda.

¹⁹ Ntangu yayi, mazono na nkokila ntangu mu bikaka bana nionso ya fioti kubasika, kento ya munu mpe bawu nionso, na yinzo, mu salaka nsilulu mosi na Mfumu Nzambi. Mpe mu tubaka na Mfumu Nzambi, “Kana Nge ke sakumuna munu na nzila yina mu ke kwenda, mu ke sadila Nge. Kasi Nge fwana talisa na munu kisika ya kukwenda, mpe wapi mutindu kukwenda, mpe yinki kusala.” Na yina, mu kukipesaka munu mosi na Mfumu. Na—na ministere mpe nionso, mu pesaka yawu na Mfumu. Mpe mu tubaka, “Kisika nionso Nge ke zibula, nionso yina Nge ke sala, mu ke tambula na nzila yina. Tii Nge ke sala nzila, mu ke landila kaka mutindu mu kele tii Nge ke sala nzila.” Mpe mu lombaka Yandi na kusala yawu pwelele ti mu ke vunama ve na ntangu yina, samu mu ke kwikila kieleka ti beto kele kaka na digemba ya kima mosi na kusalama.

²⁰ Mu kuwaka ya me pesama na profesi na suka yayi awa na Mpangi Neville, to me pesa yawu kisika mu me zaba ti ya

vwandaka—ya vwandaka profesu yina yandi vwandaka tubila. Ntangu yayi, na yina, mu me sambila samu na beno nionso, mpe mu ke na nsatu ti beno nionso kusambila samu na munu, na yina Mpeve-Santu ke twadisa munu kaka kieleka kisika mu lendaka kwenda, yina mu lendaka sala, na yina mu ke sala kifu ve.

²¹ Beno me mona, na bantangu mingi, bantu ke banzaka ti dikabu ya profesu, ti Nzambi ke tuba kaka “Mu ke katula nge na zulu *awa*, mpe Mu ke kulumusa nge na nsi *awa*. Ntangu yayi nge ke kwenda kaka *awa*.” Mpe Yandi ke tuba ve na beno mambu nionso yango. Kana Yandi me sala yawu, na yina yinki lukwikilu ya lunungu beno kele na yawu? Beno me mona? Beno me mona, beno, Yandi ke bika beno telama beno mosi kulutila muntu yankaka. Beno me mona? Beno nionso lendaka kwisa na munu mpe kulomba mwa bima, mpe Yandi me kubwaka ata fioti ve kasi na yina Yandi ke pesa beno mvutu. Ya kieleka. Yinga. Kasi mu lenda lomba Yandi bima samu na munu mosi, mpe na bantangu mingi Yandi ke bika munu kaka munu mosi, beno me mona, ke bika kaka mu kwenda na ntwala mpe kutambula na kati ya yawu.

²² Mu ke na bima ntangu yayi yina mu fwana sala munu mosi, mpe balukanu mu fwana baka. Mpe yayi kele mfunu mingi, na yina mu lendaka ve kieleka kusala yawu tii mu ke ndima ya kieleka ti ya kele Yandi ke tuba na munu. Mpe mu—mu. . . Yandi ke pesa munu vision ve. Yandi ke bika munu kaka munu mosi. Na yina mu ke vwanda kaka mutindu mwana ya nsona, mutindu, na suka yayi, mu—mu ke zaba ve yinki nzila kukwenda. Na yina, mu me pesa yawu na Mfumu.

²³ Mu—mu kuwaka mutindu na ntangu yina, na ndosi ti, mu lendaka vutuka awa na tabernacle mpe kusadisa Mpangi Neville tii kima yankaka ke salama na nzila. Na yina, mu ke vwanda na yawu.

²⁴ Mu yufulaka Mpangi Neville na mwa ntangu fioti me luta, “Wapi mutindu dibuundu vwandaka kwenda na ntwala?”

Mpe yandi tubaka, “Mbote.”

²⁵ Mpe na yina mu ke kuwa ti beno kele diaka na makabu ya kimpewe mpe bima na kati ya beno, yina ke na kusala, makabu ya profesu, mpe—mpe kutuba na bandinga ya malu-malu, mpe lutendulu ya bandinga, yina beto me kuwa kaka mwa ntangu fioti me luta. Mpe bima yina ke tunga dibuundu, mpe mingi.

²⁶ Kasi mu banzaka, ntangu yankaka na nkokila yayi mu banza, kana Mpangi Neville. . . Kana Mpeve-Santu kutwadisa beto ve na kima yankaka, na nkokila yayi mu ke zola kuvwanda na. . . Beno nionso, na ntwala beno kwenda na suka yayi, beno sonika kiuvu mosi mpe beno tula yawu awa, mwa bakiuvu na kati ya mabanza ya beno, ti beto lendaka zaba yina dibuundu kele na kubanza. Ya kele mutindu yina ba-pasteur fwana kaka kuzaba yina kele na ntima ya bantu. Mpe mosi na mosi ya beno

kele na kiuvu, beno sonika yawu mpe beno tula yawu awa. Kana beno kele ve na kitini ya papié samu na ku—kusala yawu na suka yayi, na yina beno sonika yawu na nkokila yayi, na tangu ya mbote. Na yina, mu ke zola vwanda kaka na ntangu mingi mutindu mu lendaka, na zulu ya yawu, samu na kutala yawu mpe kupesa mvutu na nzila ya Masonuku.

²⁷ Na yina kana Mfumu kuzola, kana ya ke vwanda luzolo ya Nzambi; mu salaka nsamunu mosi awa ntama mingi ve, ti mu ke zola kutuba na beno na zulu ya Bidimbu sambwadi ya nsuka ya . . . ya Apocalypse. Ntangu yayi kana beto . . . Mu lendaka ve kukota na Bidimbu yina nionso na mvula yayi, samu ya ke baka kubanda kapu ya 6 ya Apocalypse, landila—landila kapu 19, samu na kukota na Bidimbu yina. Kasi tatu ya ntete to yiya ya yawu lendaka baka mvutu na kati ya nkokila mosi, mu banza, konso Kidimbu ke vwanda samu na nkokila mosi.

²⁸ Ntangu yayi, kana beto ke bakula, beno tala kisika beto ke sukisa na Buku yina ya Apocalypse, kisika ba zangulaka Dibuundu na Nkembo, na manima yina ke bikana ya yawu ke tala ba-Juif, na Dibuundu ve na mutindu nionso. Ya me tala yinsi ya ba-Juif. Na yina beto fwana kulumuka diaka, kubanda na Enlevement ya Dibuundu, mpe kubaka . . . Beto ke mona awa yina ke salama na ntangu ya Bidimbu yina, mpe ntangu ya Dibuundu ya Bantu ya makanda. Dibuundu me kwenda; mpe na yinsi ya Israel, ya ke vutukisa mpe ke nata Israel na ntangu yina sukaka na bawu, tii na ntangu ya bilumbu yayi; mpe nkwezulu ya Mesiya, ntangu ba ke ndima Mesiya.

²⁹ Ntangu yayi beno me bakula yawu? Dibuundu me kwenda. Nzambi salaka ntete na Dibuundu, Bansungi ya Dibuundu. Beto bakaka yawu. Na manima Dibuundu me kwenda na Nkembo. Na manima Mpeve-Santu ke vutuka mpe ke baka Israel, mutindu yinsi. Mpe ke nata yawu tii kisika yayi, na ntangu ya Madia ya Makwela ke salama, na manima ke vutula Bawu diaka na nsuka ya ntangu yina. Mu ke vwanda na tablo ya munu na zulu awa, mpe mu ke vwanda na kiyeka ya kuyema yawu mpe kulonga yawu, ntangu ntangu yango ke kwisa. Na yina Mfumu ke vutuka na Kento ya makwela, mpe Israel ke mona yandi. Mpe, oh, wapi ntangu ya ke vwanda!

³⁰ Ntangu yayi, na ntwala beto lenda kieleka kuvukisa yawu, ya kele na dilongi mosi yina kele disakuba samu na ba-théologien mpe bantu mingi, mpe balongi kuna na kati ya nsungi, mpe bantu ya Dibuundu ya Klisto yina ke kwisa samu na kuwa yayi, ya zola tuba, Basabala Sambwadi ya Daniel. Beto fwana vwanda . . . Beto lenda kwenda na ntwala ve na Apocalypse tii beto ke vukisa Kento ya makwela na Israel kintwadi na Basabala Sambwadi ya Daniel. Mpe ntangu yankaka, kana Nzambi kuzola, na yina kana Yandi lendaka tuba na munu na ntwala, samu na kutuba na zulu ya Basabala yina Sambwadi . . .

to, Basabala Sambwadi ve, kasi Bidimbu sambwadi ya nsuka. Na yina na Lumingu ke kwisa, mu ke meka na kubaka Basabala Sambwadi ya Daniel, Lumingu ke kwisa, kana Mfumu kuzola. Na manima yina ke pesa nzila na ntangu yina, kana Yandi lendaka twadisa beto, na kubanda yankaka. Mbote, beto ke zaba yawu na ntangu yina.

³¹ Mpangi Neville mpe munu ke sala kintwadi na zulu ya yayi, mpe kusala nionso yina beto lenda samu na mambote ya bantu.

³² Ntangu yayi, na kuvutukaka na manima ntangu nionso, beto ke sambila samu na bambevo, beto kele ntangu nionso na kiesa na kusala yawu. Mpe mu ke sala yawu kieleka na konso lukutakanu, kana bantu kele ya kubela, samu na kusambila samu na bawu.

³³ Mu ke na nsatu diaka ya kuvwanda na kuswasikisa ya mabanza. Beno me mona, ntangu yayi tala yina salamaka. Mu me meka. Mpe mu zaba ti mu me sala bima yina kele mbote ve; kasi mu me meka na kuzinga pene-pene mingi na Nzambi, ntangu nionso, na Nzambi, ya kele mutindu yina ba-vision yayi ke salama, wapi mutindu ya ke salama. Ata mpe bantu ke zimbisa bima, mpe ke bokila munu, ke lombana na munu na kusambila Mfumu, samu na kuyufula kisika ya vwandaka. Mutindu Jesse zimbisaka ba-mulet, mpe bana-babakala kwendaka mona profete, mpe yandi tubaka na bawu ti ba-mulet kuvutukaka na yinzo ya yandi. Nionso yina mutindu yina, yina kele kieleka mbote mingi. Kasi ya kele na mingi ya yawu, na yina bantu mingi. . . Kaka na kizunga ya mutindu yayi ve; ya kele na yinza ya muvimba, beno me mona. Na yina ya ke kuma kaka, ya ke panza munu ntangu nionso, na manima ya ke tula beno kaka na nsongi ntangu nionso, tii ya ke kuma na kisika yina . . .

³⁴ Mpe yawu yina me sala ti bampangi kubanda malongi, ti mu vwandaka Mfumu Yesu Klisto na kati ya nzutu. Mpe beto zaba ti yina ke panza Ministere nionso bitini-bitini, mpe ke nata nsoni na zulu ya Klisto mpe bima nionso. Beno me mona? Na yina ya kele samu na yawu mu vwandaka ningisa bawu ngolo mingi, samu na kukanga yawu na mbala mosi, samu bawu zaba ti yina vwandaka ve ya Nzambi, ya vwandaka ya diabulu. Beno me mona? Mpe bawu kele bantu ya mbote. Mpe ya me monana ti bantu yango me butuka mbala ya zole na Mpeve ya Nzambi, samu, ntangu ba me mona Kieleka na nzila ya Masonuku, ba me vutuka na Nzambi, kieleka, beno me mona, na nswalu nionso. Na yina, ya me talisa ti ya vwandaka Satana vwandaka meka na kusala kima mosi na bantu; ba vwandaka bawu nionso basantu, Baklisto.

³⁵ Mpe ya salaka ti mingi ya bawu kutuba na munu, “Mpangi Branham, beto ke tula kivuvu mingi na nge ntangu yayi kulutula mutindu beto vwandaka na yawu ntete.”

³⁶ Samu, beno me mona yina, na dikabu yina Nzambi pesaka munu, yinki mu lendaka sala na yawu? Mu me losa yinsi na makulu ya munu, to, bantu. Yina beto ke bokila *yinsi*, kele ve “kosmos” awa, chair à canon mpe nionso yina. Mu zola tuba Baklisto, mukwikidi ya kieleka, ya kele crème ya... Beto ke tubila *yinsi*, beto ke longa “bantu yina me butuka mbala ya zole,” yawu yina beto ke tubila, yinsi. Ya kele bantu nionso ve awa, ya kele mvindu mingi mpe mvindu diaka ti beto ke zinga na yinza, yina kele kaka—yina kele kaka putulu ya ntoto yina ke vutuka. Mu ke tubila Baklisto yina me butuka mbala ya zole, bantu yina kele Baklisto ya kieleka.

³⁷ Mu ke vingila muntu mosi kudumuka na zulu ya munu diaka samu na kima mosi. Muntu mosi kwisaka na munu ntama mingi ve, mpe tubaka, “Dibanza ya kieleka, ya Klisto losaka mate na ntoto, na mate ya Yandi, mpe salaka mukati mpe pakulaka yawu na meso ya muntu.” Yandi tubaka, “Wapi mvindu, nzanzi yina vwandaka, samu na Yandi na kulosa mate, na kubasisa mate ya Yandi na yinwa ya Yandi! Wapi mutindu ya vwandaka kukondwa bunkete, kulosa mate na kati ya mvindu, mpe kusala mukati ya poto-poto mpe kutula yawu na zulu ya meso ya muntu.”

Mu tubaka, “Kasi yandi monaka diaka.” Beno me mona, yawu yina.

³⁸ Mpe bakala yina mosi! Ba me zibula camp ya bantu ya kinkonga kuna pene-pene ya sika ya munu, beno zaba, piscine. Mpe—mpe bakala yina kele na tiké samu na bana ya yandi nionso samu na kukwenda kuna mpe kutaya na piscine yina. Mpe yandi mpe kento ya yandi me kwenda, diaka, na piscine yina. Beno lemvočila munu, bampangi ya munu ya bakento. Kasi kisika yina bakento ke taya kuna, pene ya nkama mosi ya bawu, to zole, konso kilumbu; bakento, mvindu yina nionso mpe bima, mpe bakento konso kilumbu, mpe ke sukula na masa yina, mvindu yina mpe nzanzi yina na kati ya bayinwa ya bawu, mpe ke mina yawu mpe ke basisa yawu. Mu ke zola kaka yandi dumuka na zulu ya munu, beno me mona.

³⁹ Ba tubaka, “Kana—kana Klisto vwandaka zinga bubu yayi, ba zolaka kukanga Yandi samu na diambu yina ya kukondwa bunkete.”

⁴⁰ Wapi mutindu *yina*? Mu me ndima ti beno ke simba yina mu ke tuba. Ba ke kwenda na piscine yina mpe mingi ya bawu na bimbevo, syphilis, gonorrhée, mpe bima yankaka, kuna na kati. Mpe beno ke lobola yawu kaka na yinwa ya beno, mpe bima nionso ya mutindu yina, mpe kusukula na kati kuna mutindu yina. Mpe ya kele bunkete, mutindu yina?

⁴¹ Na yina, oh, la la, na kilumbu yayi beto ke na kuzinga, mpangi-bakala, mpangi-kento! Ya kele ntangu ya Nkwizulu ya Mfumu! Mpe Dibuundu kele na kivuvu mosi kaka, mpe ya kele Nkwizulu ya Mfumu.

42 Mbote, mu lendaka sukisa mambu yina ve; ya kele na nsatu ve. Biblia zabisaka na ntwala ti ya ke vwanda awa. Mu lendaka sukisa yawu ve. Kasi mu ke zola ba kanga ndinga ya munu na Zulu, ti mu vwandaka telemina yawu, ntangu ntangu ya Lusambusu ke kwisa. Mu vwandaka telemina yawu.

43 Mu ke kwikila kaka ti Biblia yayi kele Ndinga ya Nzambi. Na yina ya kele na kima yankaka ve na yinza, yina me swaswana na Yawu, lenda sukisa Yawu. Kasi Biblia yayi awa, yayi kele Kieleka, yayi kele Ndinga ya Nzambi. Na yina ntangu yayi beto benda bavwale ya beto—ya beto—ya beto, mpe losa longo na mwa ntangu fioti na ndambu yankaka ya mukidi ya ngemba ya Zulu ya Kupema. Mpe—mpe beto lenda nata masuwa mbasi kisika mosi kuna, kasi beto losa kaka longo ntangu yayi mpe kuwa Ndinga ya Tata ya beto ya Mazulu mutindu Yandi ke tuba na beto na nzila ya Ndinga ya Yandi, beto ke na kivuvu, bubu yayi.

44 Mpe na nkokila yayi, ntangu yayi, beno me kubika bakiuvu ya mutindu nionso beno ke na yawu. Ntangu yayi, ya kele ve kima mosi yina ke niongisa muntu mosi. Kana beno sala yawu, na yina ya kele. . . Mu me pesa ve mvutu na yina, na kubanda, beno me mona. Kasi beno, *kima yankaka*, beno ke tuba, “Mbote, ntangu yayi, kana mu ke sala kima yayi, Nzambi me tuba ti beto lendaka sala yayi?” To, beno zaba, mwa bakiuvu na ntima ya beno. To, “Beto kele na makabu yina ke sala na beto, Mpangi Branham, mpe beto lendaka sadila yawu mutindu *yayi* to mutindu *yiya*? To, yinki beto lendaka sala?” Kima mosi yina mu lendaka pesa beno mvutu na kati ya Masonuku, beno zaba. Mu ke sonika mwa kima mosi. Mu ke vwanda na kiese. Mpe kana ya kele na mosi ve, na yina mu ke baka kaka dilongi ya mutindu yankaka mpe mu ke longo na beno na nkokila yayi, kana Mfumu kuzola. Yayi kele Lumingu, mpe mu vwandaka. . .

45 Lumingu me luta mu bandaka na kukwenda kuna na yinzo ya Mpangi Cauble. Mpe mu kuwaka ngunga ya yinzo-Nzambi yayi ke bula, mpe mu kwendaka kaka kuna mpe kotaka na lupangu. Mu lendaka ve kundima yawu. Ya vwandaka nionso. Mu kuwaka beno, na yina mu—mu—mu zolaka kwisa kaka.

46 Na yina ntangu yayi beto kulumusa kaka bayintu ya beto mpe beto tuba na Kiyidiki ya beto, mpe yina na mpova ya kisambu. Muntu mosi kele na lombilu ya mfunu mingi? Beno telemisa kaka maboko ya beno na zulu, beno tuba kaka, “Mu. . .” Mu talisa yawu kaka. Nzambi zaba yina kele na ntima ya beno. Ntangu yayi beno bumba kaka lombilu ya beno na mabanza ya beno.

47 Nzambi ya kulutila Santu, Yina vangaka Mazulu mpe ntoto na nzila ya Ndinga ya yinwa ya Nge, na nzila ya mabanza ya dibanza ya Nge, beto ke kwisa na Mvwandulu ya Nge, na nzila ya Yesu Klisto, Mfumu ya beto, samu na kupesa Nge matondo samu na nionso yina Nge me sala samu na beto. Mpe beto ke vutula

matondo mingi na Nge, Mfumu, na suka yayi, samu na kuzaba kisika beto me telama, samu na kuzaba kisika yina beto kele na suka yayi, mpe disolo ya ntangu, mpe mambu yina ke kwisa na ntwala. Na kuzabaka bubu yayi, ti na nzila ya lemvo ya Nzambi, ti ba me sukula beto na Menga ya Calvaire, ti beto me kubama, na lukwikilu na kati ya bantima ya beto, samu na kukutana na Yandi kana Yandi lendaka kwisa bubu yayi. Beto lendaka tuba, “Kana ya ke mutindu yina, kwisa, Mfumu Yesu.”

⁴⁸ Mpe beto ke mona disumu ke na kufuluka, na yina ya ke monana ti yinza ke na kutenga-tenga na nsi ya kubendama ya disumu. Wapi mutindu malafu mpe nsaka ya mbongo, mpe biese ya yinza, mpe kinkonga, mpe, O Nzambi, mvindu, mpe mvindu mpe poto-poto ya bantu. Mpe wapi mutindu bawu, kana ba lendaka kaka kubakula, Mfumu! Bantu yina, yina ke lwata mutindu yina na mwa bilele yina ya ntama ya kukondwa busantu, mpe ke basika kuna na bala-bala, ba ke bakula ti ba kele kima mosi ve kasi baniama mpe putulu, ti ntangu yankaka na sabala ke kwisa baniama ke kudia nzutu yina ba ke kembila mingi? Ba ke bakula ti misobi ke kudia yawu, mpe moyo ya bawu ke vwanda kuna na zulu na Seko kukondwa Nzambi, kukondwa Klisto, kukondwa kivuvu, ya kudinda na kati ya kiadi ya nene, samu na kuzimbana kimakulu na Nkwizulu ya Yandi? O Nzambi, pesa beto bandinga ya—ya ndongisila, ti beto lenda kebisa moyo nionso na kigonsa yayi ke na ntwala ya bawu.

⁴⁹ Vwanda na beto bubu yayi. Pesa beto “bandinga ya ndwenga,” mutindu Salomon na ntangu mosi tubaka na Ecclesiastes, ti beto zola vwanda “mitungi ya ndwenga,” ti beto ke vwanda “mivungi ya kimvuka yayi.” Mpe beto ke sambila, Mfumu, ti mutindu beto ke sosa bandinga ya kutuba, ti ya ke vwanda—ya ke vwanda bisalu ya kulunga yina ke simba ntima yina kele na nsatu mingi awa na suka yayi.

⁵⁰ Beto me kwisa ve mpe beto me vukana ve na nsi ya muludi yayi ya ndungutila bubu yayi, kaka samu na katalana, kasi beto me kwisa awa samu beto ke zolaka Nge, mpe samu beto ke na nsatu ya kuwa Nge. Nge kele Nzola ya beto yina beto ke zolaka, mpe beto ke na nsatu ya kuwa Badinga ya Nge. Beto ke vutula matondo samu na yina beto me kuwa ntete. Ya ke vwanda ntangu nionso na beto. Ntangu yayi pesa beto kitini yina Nge kele na yawu samu na beto, mutindu beto ke vingila na ntwala na Nge. Beto ke lomba yawu na Nkumbu ya Yesu, mpe samu na zola ya Yandi. Amen.

⁵¹ Ntangu yayi ya kele. . . [Mpangi-kento ke tuba na ndinga ya malu-malu, mpangi-bakala mosi ke pesa ntendulu—Mu.]

⁵² Beto ke vutula matondo mingi samu na baluzangulu yayi ya Mpeve, ya ke tuba na beto mpe ke kebisa beto samu na kutala mbote Badinga yina ntangu yankaka Mpeve-Santu ke tuba na beto bubu yayi. Mpe beto me zaba ve yina Yandi ke na yawu

na kibumbulu samu na beto, kasi beto me zaba ti ya fwana vwanda na kima mosi yina Yandi ke tuba. Ntangu yankaka kiuvu mosi kele na mabanza ya beno, ti Yandi ke tubila yawu kuna. Yandi lendaka tuba yawu na nzila ya Nsangu na suka yayi. Yandi lendaka tuba yawu na nkokila yayi na lukutakanu. Yandi, kisika mosi kuna bubu yayi, Yandi ke meka, mutindu, kukebisa muntu mosi na kusimba Bandinga.

⁵³ Ntangu yayi na kukota na Ndinga yina me sonama, beto kwenda kuna na Buku ya Exode, samu na dilongi ya Lukolo ya Lumingu.

⁵⁴ Beno kele na kisalu ya mbotika? [Mpangi Neville me tuba, “Ve, ve tii na ngunga ya sambanu na nkokila yayi.”—Mu.] Ve. Kisalu ya mbotika kele na ngunga ya sambanu na manima ya midi yayi.

⁵⁵ Beto kwenda na kapu 17 ya Exode, mpe kubanda na—na nzila ya 5, mu banza, nzila ya 5 mpe ya 6 ya kapu 17 ya Exode.

Mpe MFUMU tubaka na Moise, Kwenda na ntwala ya bantu, mpe baka bakuluntu ya Israel; mpe nata nkawa ya nge, na yina nge bulaka nzadi, simba yawu diboko ya nge, mpe kwenda.

Tala, Mu ke telama na ntwala ya nge...na zulu ya ditadi yina kele kuna na mongo Horeb; mpe...ke bula ditadi, mpe masa ke basika na yawu, yina bantu lendaka kunwa. Mpe Moise salaka mutindu yina na ntwala ya bakuluntu ya Israel.

⁵⁶ Ntangu yayi kana mu lendaka bokila yawu mwa dilongi ya Lukolo ya Lumingu, mu ke zola baka yayi mutindu dilongi samu na dilongi ya suka yayi, *Masa Ke Basika Ntangu Nionso Na Ditadi*.

⁵⁷ Beto zaba ti Israel ke vwandaka ntangu nionso mbandu ya masolo samu na dibuundu. Samu, Israel vwandaka bantu ya Nzambi tii bawu basikaka na Egypte, na yina ba vwandaka dibuundu ya Nzambi samu ba vwandaka me kabwana na yinza.

⁵⁸ Mpe ntangu beto me kabwana na yinza, na yina beto me kuma dibuundu. Kasi na ntangu nionso beto ke vukana na yinza, na yina beto kele ve na dibuundu. Ntangu yayi mu ke na kivuvu ti yina ke kwenda kieleka na mudindu, ya ke baka kisika ya yawu. Beno me mona, beto ke vwanda ve dibuundu tii beto ke kabwana na yinza. Kukabwana beto mosi, kubasika na kati ya bantu ya masumu, kukipe bawu ve, mpe kuvukana ve na masumu ya bawu. Kusepela ve na bantu kukondwa lukwikilu, kasi kabwana na bima ya yinza.

⁵⁹ Mpe ntangu Israel vwandaka na Egypte, ba vwandaka bantu ya Nzambi. Na yina ntangu ba bokilaka bawu na kubasika, to vwandaka na exode, na kubasika, na yina ba bokilaka bawu

dibuundu, samu ya salamaka ti ba kabwanaka bawu mosi na yinza.

⁶⁰ Mpe mpova ya kieleka *dibuundu* zola kutuba “yina ba me bokila na kubasika.” *Exode*, “kubasika.” Mosi na mosi ya beto, mutindu Baklisto, me kuzwaka exode na luzingu ya beto. Beto vwandaka na ntangu yina ba bokilaka beto na kati ya bankundi ya beto, ba bokilaka beto na kati ya bantu yina beto vwandaka vukana na bawu ntete, mpe beto me kuma bantu ya luswaswanu, samu na kutuba na bantu ya luswaswanu yina ke zingaka na mutindu ya luswaswanu mpe yina ke tubaka na mutindu ya luswaswanu. Ya vwandaka exode na luzingu ya beto.

⁶¹ Mbandu mosi ya kitoko Israel me pesa beto, ya ntangu Nzambi bokilaka bawu na kubasika. Ba vwandaka na exode, mpe basikaka na kati ya bantu ya yinza, mpe me kuma yinsi yina me kabwana, samu na Nzambi, bantu ya luswaswanu. Ba vwandaka tambula na nsi ya bivudi ya kisika ya mawa. Ba vwandaka zinga mpe vwandaka tambula na nzila ya Dikunzi ya nene ya Tiya. Mpe Nzambi basisaka bawu na Egypte, nataka bawu na yinsi yina Yandi silaka.

⁶² Mpe, na exode yayi, ba pesaka bawu ntwadisi ya kimpeve, ntwadisi, yina vwandaka Moise, profete ya nene ya kupakulama yina vwandaka muntu ya nene. Yandi vwandaka muntu ya santu, yandi butukaka muntu ya santu. Nzambi bokilaka yandi kubanda mama ya yandi, ata mpe na ntuala ya ntangu yina; Nzambi kukubikaka yandi na ntuala ya mbandukulu ya yinza, samu na kuvwanda ntwadisi samu na nsungi yina, samu na kunata exode yayi na bantu.

⁶³ Awa ntama mingi ve, mu vwandaka tuba na bana ya fioti awa na tabernacle, mpe mu vwandaka na mwa dilongi mosi samu na bawu; mpe mu tubaka, to pesaka mwa mbandu mosi ya mutindu Jokebed, wapi mutindu yandi sambilaka, yandi mpe Amram, tata ya Moise, samu na kusala kima mosi samu na kukatula bantu na kimpika. Mpe Amram monaka vision ya Nzambi me telama, to Wanzio, ke tala na nord, mpe tubaka na yandi yina ke salama. Mpe Moise ya fioti butukaka. Mpe ba vwandaka na boma ve ya misiku ya ntinu, to bantitisa ve. Ba zabaka ti Nzambi vwandaka na diboko ya Yandi na zulu ya Moise, mpe yina sukisaka yawu. Ya kieleka. Ya lenda vwanda yina ntinu me tuba, yina yinza ya politiki me tuba, yina kima yankaka me tuba, ba zabaka ti Nzambi vwandaka na diboko ya Yandi na zulu ya Moise. Na yina ba vwandaka ve na boma ya kuyambula yandi, kuna na kati ya bangandu; ntangu bawu nionso vwandaka kaka nene samu na bana ya fioti ya ba-Hebreux, kisika ba vwandaka pesa bawu kuna madia na bangandu. Mpe ntete ba tulaka Moise kuna na kati ya mwa nzaza mpe fidisaka yandi kuna na kati ya bangandu, kuna na kati ya bawu. Samu, ba vwandaka na boma

ya kima mosi ve, ba zabaka ti Nzambi vwandaka na diboko ya Yandi na zulu ya Moise.

⁶⁴ Mbote, ntangu yayi, kana beto lendaka kaka kuzaba kima yina mosi, ti Ntwadisi ya beto ya nene, Mpeve-Santu, Nzambi me fidisa Yandi, mpe Yandi kele Ntwadisi ya beto, mpe ya ke sala kima mosi ve yina yinza ke tuba, mpe wapi mutindu ba ke seka beno mpe ke vweza beno, beto ke landa Ntwadisi ya beto! Nzambi me fidisa Mpeve-Santu samu na kuvwanda Ntwadisi ya beto. Beno me mona? “Na mwa ntangu fioti yinza ke mona Munu diaka ve. Kasi beno ke mona Munu, samu Mu ke vwanda na beno, ata mpe na kati ya beno, tii na nsuka ya yinza.” Na yina, Ntwadisi ya beto ya nene kele na beto, Mpeve-Santu. Ntangu yayi beto fwana landa Ntwadisi yayi mpe kusala mutindu Yandi ke tuba na kusala. Mpe Ntwadisi yayi ke basisa beto ata fioti ve na nzila, Yandi ke keba beto na kati ya nzila ya Masonuku ntangu nionso. Kasi Yandi ke kwenda ata fioti ve na lweka *mosi* samu na kima mosi, mpe na lweka *yayi* samu na kima mosi. Yandi ke vwanda kaka ya kusungama na nzila ya Masonuku.

⁶⁵ Mpe Moise vwandaka na nzila yina yandi lendaka baka na Israel, mpe kulanda yawu kuna na Mubu ya Mbwaki, kuna na Jourdain, kuna na yinsi ya nsilulu, kuna na yinsi ya nsilulu, kuna na ntoto ya kuyuma. Ya vwandaka ve Moise basikaka na nzila. Ya vwandaka ve Nzambi basikaka na nzila. Ya vwandaka bantu basikaka na nzila, yina pesaka mpasi. Na yina, beto banza na bima yayi ntangu yayi. (Beno lemvokila munu.)

⁶⁶ Moise, mutindu ntwadisi yina ba me pakula. Na nsuka, ntangu yandi talisaka na bantu, na nzila ya bidimbu mpe mambu ya ngitukulu, ti Nzambi kaka lendaka sala, yandi salaka bidimbu yayi mpe mambu ya ngitukulu na ntwala ya bakuluntu ya Israel, mpe na ntwala ya Israel, tii ba sepelaka ti Moise yayi vwandaka mosi yina me pakulama yina zolaka basisa bawu na yinsi yayi, samu na kukwenda na yinsi yina ya mbote yina ba silaka bawu. Na yina na ntangu ba monaka bima yayi ya nene yina Moise salaka na nkumbu ya Nzambi, ba ndimaka na kulanda yandi. Mpe yandi basisaka bawu, twadisaka bawu na kati ya Mubu ya Mbwaki, zabukaka kuna, ya vwandaka ntoto ya kuyuma, mpe na kati ya nzietolo ya ntoto ya kuyuma, yina zola kutuba ntangu ya bakumekama.

⁶⁷ Ntangu mpangi mosi ke ndima Klisto mutindu Mvulusi ya yandi, bima nionso kele na zulu ya yinzo. Kasi, na ntwala muntu yayi lendaka kuma na mbotika ya Mpeve-Santu; muntu yayi, yandi fwana vwanda ntete kulanda nzila ya busantu. Yandi fwana vwanda na ntangu ya kumekama na luzingu ya yandi. Beno nionso vwandaka na yawu. Yandi vwandaka na ntangu yayi ya kumekama. “Mwana nionso yina ke kwisa na Nzambi, ntete ba ke bula yandi fimbu, ba ke semba yandi, ba ke sungika. Mpe kana beto lendaka manga kitumbu, na yina ya ke talisa ti

beto kele ve bana ya Nzambi; beto kele bana ya makangu, mpe kasi bana ya Nzambi ve,” Biblia me tuba. Kasi kana beto lenda kundima ndongisila, na kuzabaka ti “mambu nionso ke salaka kintwadi samu na mambote ya bayina ke zolaka Nzambi,” na yina beto kele bana-babakala mpe bana-bakento ya Nzambi, na yina Yandi ke tula beto kidimbu na Mpeve-Santu tii na kilumbu ya mpulusu ya beto. Beno me mona, ya kele ndongisila, kubendama, kima yina sika wapi beto ke luta.

Mpe Israel, mutindu mbandu ya masolo, zolaka baka ndongisila yayi.

⁶⁸ Ntangu yayi, ntangu ba vwandaka kuna na Egypte, mpe Nzambi fidisaka Moise. Mpe yandi tandaka nkawa, mpe bampese mpe banzenga kwisaka na ntoto. Yandi tulaka yawu na mwini, mpe yawu dindaka. Yandi tulaka yawu na zulu ya masa, mpe yawu balukaka menga. Samu na yinki, Israel vwandaka kuna na Canaan. . .kuna na—na Goshen, ba vwandaka kaka na ntangu ya nkembo; mwini dindaka ata fioti ve, bampasi bulaka bawu ata fioti ve; na yina, ba vwandaka kaka na ntangu ya nkembo!

⁶⁹ kaka mutindu beno salaka na ntangu beno vulukaka na mbala ya ntete. Bima nionso, bandeke yimbilaka na mutindu ya luswaswanu, mpe bantu nionso vwandaka swi. Mpe, oh, la la, wapi mutindu bima vwandaka kaka mbote mingi ntangu beno vulukaka na mbala ya ntete! Na manima ntangu kumekama kwisaka, ntangu ya kusunemba, ntangu ya busantu, kukisantisa beno mosi na bima ya yinza, “kutula na lweka bizitu yina nionso kukondwa mpasi ke kanga beno.” Beno, bakala mosi, fwana kubika kunwa makaya, kubika kunwa malafu, kubika kukwenda na piscine, bampimpa ya beno nionso ya bafeti ya bakalati. Bima yina nionso, beno fwana kukisantisa beno mosi na yawu, na nzila ya lukwikilu kati ya Menga ya Yesu Klisto. Kukisantisa beno mosi! Beno bakento fwana bika bansuki ya beno kuyela, kukumisa yinda ba-robe ya beno, mpe kuzinga na mutindu ya luswaswanu na yina beno vwandaka. Ntangu ya busantu! Na bantangu mingi ba ke tumama ve mpe ke vutuka; mbote, yina kele ve mwana ya Nzambi, beno me mona. Mwana ya Nzambi ke tala kaka na Calvaire, mpe yandi zaba ti ya kele samu na mambote ya yandi.

⁷⁰ Na yina kitamina yina ya ntangu, ya kele na ntangu yina kubwa ya nene kwisaka, na Israel. Na ntangu ya ntangu yayi ya nene ya kufuluka, na yina bantu bandaka na kubwa, na lweka mosi na yankaka. Na yina na kati ya kuswana ya bawu, “Mbote, beto banza ti beto fwana vutuka na Egypte. Mioyo ya beto ke vweza dimpa yayi ya pepele.” Na nzonzolo yankaka, kana mu zolaka baka yawu na mutindu ya masolo ntangu yayi, yawu yina ya me tuba.

⁷¹ Ntangu yayi na kilumbu yayi, ya ke vwanda, “Oh, konso Kilumbu ya tatu na nkokila, lukutakanu ya bisambu! Konso Lumingu na suka, kuvutuka na yinzo-Nzambi! Yinki beto ke kuwa? Kima mosi; longi ke telama mpe ke longi; bankunga; ke vutuka na manima.” Beno me mona, na yina beno ke kwenda kaka mutindu ndonga ya kisalu. Beno kele musambidi ve. Musambidi ke kwenda kuna samu na kusambila, samu na kutuba yandi mosi na ntuala ya Nzambi ya yandi, samu na kukumisa Nzambi samu na mambote ya Yandi; na konso Ndinga, yandi ke kangama na Yawu.

⁷² Ya kele kaka mutindu diambu ya zola. Kana beno vwandaka basika na mwana-kento samu beno me zaba ti ya vwandaka kisalu, to beno ke basika na mwana-bakala mosi, ntangu beno vwandaka mwana-bakala ya ntwenia. “Mama ke zola ti mu basika na mwana-bakala yayi, kasi mu ke sepela na yandi ve.” Beno ke kuzwa kima mosi ve na yandi ntangu yandi ke kwisa kutala beno. To, kana ya kele mutindu mosi samu na mwana-kento na mwana-bakala, to mwana-bakala na mwana-kento. Beno ke basika na yandi, yandi ke yangisa beno; mama ke zola ti beno basika na yandi samu yandi kele mutindu ya mwana-kento yina mama ke zolaka. Beno me mona, yawu ke yangisa beno; diambu ya zola kele ve. Kasi beno ke kipe ve, beno ke zola ve kusukula, beno ke zola ve kukwenda tala yandi. Mpe ya kele . . . Na yina, ya kele diambu ya mpasi. Mpe ntangu yandi ke kwisa kutala beno, oh, la la, beno ke zola kaka yandi sala nswalu, yandi kwenda.

⁷³ Ya kele mutindu mosi ntangu beno, “Samu na yinki yandi ke longi ntangu ya yinda? Yinki samu mambu *yayi* nionso, mpe bima nionso?” Beno me mona, beno kele ve na zola.

⁷⁴ Kasi ntangu beno ke kangama kieleka na konso Ndinga, mutindu Mpeve kebisaka beno na suka yayi, beno me mona, “Kukangama na konso Ndinga.” Ya lendaka vwanda yina Yandi vwandaka tubila na beno. Kusimba mbote! Ya kele Luzingu ya Kukonda nsuka, konso Ndinga ya Nzambi. Ya kele kiese na kukwenda na yinzo-Nzambi, na konso ntangu yina. Ata ti mwini kele ngolo, madidi, yimbi, to bantu ke na kuswana, ke ngana, nionso yina ba ke na kusala, ya ke vwanda kaka kiese na kuwa Ndinga ya Mfumu. Na yina beno kele na zola na ntangu yina na Klisto, beno me mona, beno ke zola kukwenda na yinzo-Nzambi.

⁷⁵ “Mbote, cherie, tala ya kele suka ya Lumingu diaka, mu banza ti beto fwana sukula baleke mpe kukwenda kuna. Oh, la la, ya ke yangisa mingi!” Beno me mona, beno kele ve na zola.

⁷⁶ Kasi kana beno kele kieleka na zola, beno lenda ve kaka kuingila tii Lumingu na suka ke kwisa, beno fwana kaka kukwenda kuna na bawu. Mpe beto ke kuzwa, mpe kukwenda . . . Bantu ya Nzambi, ba ke yangisa bawu ve. Samu, ba kele—ba kele bampangi-babakala mpe bampangi-bakento.

Mutindu mu vwandaka tuba, “Beno ke kuma fioti mutindu potopototo ya Sorgho na suka ya madidi.” Ya ke tambula ve, ya ke vwanda kaka kintwadi, beno zaba, ya ke kangama ngolo. Ntangu yayi, ya kele nzonzolo mosi ya ngolo, kasi ya ke—ya—ya ke meka kubika beno zaba yina mu zola tuba, beno me mona. Beno ke bikala ya kukangama kintwadi. Mpe mutindu ya ke kuma madidi mingi, ya ke kangama mingi. Mpe ya kele mutindu yina ya lendaka vwanda na beto. Mutindu madidi ke kuma mingi . . .

Ntangu bankundi ya ntoto ke yambula,
Kangama diaka mingi na Yandi.

⁷⁷ Mpe yina beto ke zolaka, mosi na yankaka, kele ve samu ti beto kele muntu mosi; kasi ya kele Klisto na kati ya mosi na yankaka, yina beto ke zolaka, beno me mona. Ya kele Nzambi yina kele na kati ya bampangi ya beto, yina beto ke zolaka. Ntangu yayi beto ke zolaka kuvwanda kintwadi. Beto vwandaka yimbila nkunga yayi ya ntama:

Nsinga ya ngwisani kusakumuka
Yina ke vukisa bantima ya beto na zola ya
Baklisto;
Ngwisani ya mpeve mosi
Ya kele mutindu yina ya Zulu. (Beno me mona?)

Ngwisani ya mpeve mosi
Kele mutindu yina ya Zulu.

Na ntwala ya Kiti ya kimfumu ya Tata ya beto,
Beto ke pesa bisambu ya beto ya tiya;
Boma ya beto, bivuvu ya beto, balukanu ya
beto kele mosi,
Biese ya beto mpe ba-souci ya beto.

⁷⁸ Beno me mona? Yinga, tata! Ntangu mosi vwandaka na lusakumunu, beto nionso vwandaka na kiese samu na yawu. Ntangu mosi kele na kiadi, beto kele na kiadi na yandi. Beto—beto nionso zola vwanda kintwadi. Ntangu yayi ya kele mutindu yina beto zolaka vwanda.

⁷⁹ Mpe ya kele mutindu yina Israel zolaka vwanda. Kasi ya me kuma na kizitu mingi, “Oh, dimpa yayi ya ntama ya pepepe!” Dimpa ya Bawanzio, “Mbote, yinki beto ke banga samu na dimpa yayi ya ntama ya pepepe? Mioyo ya beto ke sepela ve na kima yayi! Mpe bima nionso ke tambula mbote ve. Mpe—mpe mana yayi ya ntama yina vwandaka kubwa konso nkokila, na yina, beto zolaka kaka mwa ba-ail mpe matungulu ya Egypte.” Beno me mona, bantima ya bawu vwandaka ve ya kukubama samu na nzietolo.

⁸⁰ Mpe ntangu bakala mosi to kento ke banda na kuniunguta samu na kukwenda na yinzo-Nzambi, ba me lembe mingi samu na kukwenda na yinzo-Nzambi, ba kele ve ya kukubama samu

na nzietolo. Ya kele kieleka. Kima mosi ke tambula mbote ve kisika mosi.

⁸¹ Oh, ntangu beno ke zola Nzambi, mpe ke banza ti beno ke kwenda na Zulu, mpe nionso ya beno ke tambula kintwadi:

Yinki ngwisani yayi, yinki kiese yayi ya
Kinzambi,
Mu me yekama na diboko ya seko;
Oh, yinki ngemba yayi ya lusakumunu na
Mfumu ya munu pene-pene ya munu,
Mu me yekama na diboko ya Yandi ya seko.

Yinki . . . Beto yimbila bankunga yina.

Beto ke kabula bampasi ya beto,
Bizitu ya beto;
Mpe mbala mingi samu na mosi na yankaka ke
basika
Mansanga ya kukabula mpasi.
Ntangu beto ke kabwana,
Ya ke pesa beto mpasi na ntima;
Kasi beto ke vwanda kintwadi na kati ya
ntima,
Mpe kivuvu ya kukutana diaka na ntangu ya
lukutakanu ya bisambu ke kwisa. (Yinga,
tata, beto ke vwanda kintwadi na kati ya
ntima!)

⁸² Ntangu yayi beno ke kubama samu na nzietolo, beno me mona, beno me kubama samu na kukwenda na Yinsi ya nsilulu. Bantangu ya kumekama, ya kele kisika ya boma; ntoto ya kuyuma, bantangu ya kumekama.

⁸³ Israel, na ntangu ya yandi ya kumekama, yandi vwandaka swaswana mpe vwandaka bendana na mosi na yankaka, mpe vwandaka vweza dimpa. Mpe ba vwandaka zola kuvutuka na Egypte.

⁸⁴ Mpe na yina ba bandaka na kuniunguta samu na ntwadisi ya bawu. Oh, ba vwandaka na boma ti yandi vwandaka twadisa bawu na nzila ya yimbi; na manima yandi me kukitalisa yandi mosi ti yandi kele ntwadisi, mpe Nzambi me talisa ti yandi vwandaka ntwadisi. “Mbote, ntangu yankaka beto me zinga mwa fioti na bufanatiki. Mpe—mpe ntangu yankaka beto me landa, beto nionso na nzila ya yimbi,” to, kima mosi mutindu yina, beno me mona, ba vwandaka swanisa Nzambi mpe Moise, Nzambi mpe ntwadisi ya Yandi.

⁸⁵ Ntangu yayi ntangu beto ke kuma na kisika yina, beto ke tuba, “Mu zaba ve kana Ndinga zola tuba *Yayi*, to ve,” mpe, “Mu zaba ve samu na Mpeve-Santu; mu ke tula fioti ntembe samu na Yawu. Mu zaba bayankaka yina ke sala yawu ve.” Mbote, kwenda na Egypte. Beno me mona?

⁸⁶ Kasi kana beno me baka kieleka lukanu ya kubikala na nzila, beno bikala kaka na Ntwadisi yayi, Mpeve-Santu, beno bikala kaka na Ndinga. Mpe kana beno ke bikala na Mpeve, Yawu ke bumba beno na kati ya Ndinga. Ya kieleka. Ya ke keba beno kaka na kati ya nzila, na nzila ya Ndinga. Mpe beno vwanda na boma ya Yawu ve. Yawu ke lwadisa kima mosi ve, Yawu ke sadisa beno kaka kana beno kele ya kulwala. Ya ke belusa bantima nionso, Mpeve-Santu ke sala yawu.

⁸⁷ Ntangu yayi beto ke mona ti, kuna na nzila yayi, na manima ba kumaka mutindu yayi, ba kumaka na kisika ya Horeb. Mpe H-o-r-e-b, Horeb, na yina beto ke mona ti. . . Beto zenga nkumbu yayi. Ya ke kisika yina nkumbu yayi *Horeb* zola kutuba “kisika ya kuyuma” to “ntoto ya kuyuma.”

⁸⁸ Mpe ntangu beto ke zenga ngwisani mosi na yankaka na kati ya dibuundu, mpe na nganda ya ngwisani na Mpeve-Santu, ya ke nata beto na kisika mosi, na ntoto ya kuyuma, kima mosi ve ke zinga, bima nionso kele na ba-tiketi na zulu ya yawu. Beno me mona, ntoto ya kuyuma, mwa kitini ya cactus na zulu ya yawu. Beno me zaba yina ya kele? Ya kele mwa dititi yina ya pete yina vwandaka na masa ve, ya me kangama ngolo mingi yawu mosi tii ya me kuma tiketi. Mpe ntangu beno ke mona muntu mosi mutindu yina, ntangu yankaka ya kele moyo ya ntalu yina ba lendaka mwangisila masa, ya lendaka vwndana mwa dititi ya pete to kima mosi. Kasi na kisika ya yina, ya me kangama yawu mosi tii ya me kuma tiketi, kaka kubula nionso, beno zaba, samu na kumona kifu. Kima mosi kaka ya ke lomba kele kaka masa. Yimeni. Ya ke kaka na nsatu ya reveil, to kupanzana, madidi ya Mfumu. Ya ke—ya ke kanguka yawu mosi, kana beno ke tula yawu kaka na masa.

⁸⁹ Kasi, ya kele kisika yina bayina ke zinga na kisika yina ke mona mpasi na mambu ya kisika yina. Mpe bayina ke zola kuzinga na atimosifere ya mutindu yina, kisika bima nionso kele kaka kubula mpe kuswaswana, mpe kubendana mpe kuniunguta mutindu yina, mbote, beno ke zinga kaka na nsi ya atimosifere yina, yimeni. Kasi beto fwana zinga kuna ve, ya kele mfunu ve samu na beto na kuvwanda kuna.

⁹⁰ Ntangu yayi, Horeb yayi vwndaka kisika yina Nzambi sukaka ntima na bantu, samu ba vwndaka yenga-yenga na kisika yayi mpe kotaka na mambu yayi. Mpe Yandi nataka bawu na lweka na yawu, samu ti ba lendaka tambula ve na nzila yina. Bawu basikaka na nzila ya mbote, ba kulumukaka na nzila yayi yankaka. Na yina ya salaka ti Nzambi kusala kima mosi yina vwndaka mpasi mingi. Yandi. . . Ya salaka ti Nzambi kupesa Moise nkawa ya lusambusu yina ya vwndaka sambisa na yawu yinsi, mpe bulaka Ditadi, samu na kubasisa masa.

⁹¹ Ntangu yayi, ya kele na dilongi mosi ya kitoko awa kana beto lendaka kusimba yawu, beno me mona. Mpe samu ti beto basika

na bisika ya madia, mpe nsinga ya yinza, mpe bima, ya me sala ti Nzambi kubaka balusambusu ya yinza mpe kubula Mwana ya Yandi Mosi na yawu, na Calvaire, ti beto lendaka vwanda na kimpwanza. Beno me mona yina mu zola tuba?

⁹² Ntangu yayi, samu na kuzwa mwa masa samu na bantu yayi, na manima ba me vwanda kuna, kisika yayi ya kuyuma salamaka na Calvaire. Mpe kuna Nzambi tubaka na Moise, Yandi tubaka, “Baka nkawa mpe bakuluntu, mpe kwenda na ntwala, mpe mu ke telama na zulu ya Ditadi na ntwala ya nge.” Mpe Ditadi yayi vwandaka Klisto. Mpe Moise, na nkawa yina yandi vwandaka nata lusambusu na zulu ya yinsi ya Israel, yandi bakaka nkawa yayi mosi mpe bulaka balusambusu ya Nzambi na zulu ya Ditadi. Beno me mona? Yandi nataka masumu ya bantu na zulu ya nkawa yayi. Na yina, yandi zolaka bula bantu. Kisika ya kubula bantu, yandi bulaka Ditadi. Mpe Ditadi, na nzila ya kisalu ya Nzambi, me nata mpulusu, me nata masa na bantu yina ke na kufwa. Ya me nata luzingu na bantu yina ke na kufwa. Mpe yawu yina Nzambi salaka na kubakaka yinti ya Yandi—ya Yandi ya nkawa ya lusambusu, mpe na kubalulaka masumu ya munu mpe masumu ya beno na nkawa yayi; ntangu ya zolaka bula beto, kasi ya bulaka Klisto; ti na Yandi *bamasa* kubasika, ya zola kutuba “Mpeve,” Mpeve-Santu me basika na Yandi, samu na kupesa beto Luzingu. Ntangu yayi beto kele na Luzingu ya Kukonda nsuka. Ntangu yayi, Ditadi yina vwandaka Klisto. Ntangu yayi beto zola bakula.

⁹³ Mu me monaka ba-dessin mingi ya bantu ya mayele ya Ditadi yayi. Mu me monaka mosi ya kulutila masawula, ntama mingi ve, tii kisika ya vwandaka na mwa ditadi mosi ya kutulula na nsongi ya mongu. Mpe—mpe Moise zolaka kubula ditadi yayi, mpe Israel vwandaka kuna na nsi na mbungu ya ti, ya vwandaka kunwa mwa matanga yina vwandaka kubwa na ditadi yayi. Ntangu yayi yina kele kaka dibanza ya muntu.

⁹⁴ Kasi ntangu Ditadi yayi basisaka bamasa ya Yawu, ya vwandaka na bantu na zulu ya mafuku zole, katula bangombe, bakamela, mpe bima yankaka nionso yina kunwaka na mabungu ya masa na Yawu. Ya vwandaka yinto ya masa yina vwandaka basika kuna!

⁹⁵ Ya kele mutindu yina ba ke meka na kusala Klisto, Mpeve-Santu bubu yayi. “Ya kele kaka mwa ditanga.” Beno me mona, kaka samu na kusala ti beno kwikila Nzambi kele. Ve.

⁹⁶ Ya kele mingi ya Masa! David tubaka, “Mbungu ya munu me fuluka!” Ya kele kaka yinto ya Mpeve-Santu.

⁹⁷ Bantu kele na boma ya Yawu. Bantu yankaka ke tuba, “Mbote, mu ke kaka na boma fioti ti mu ke sala *yayi to yina*, to kana mu ke kwenda na mwa mudindu mingi. Mu lenda talisa na beno muntu yina kwendaka fioti ntama mingi.” Kasi beno ke

talisa ata fioti ve muntu yina kwendaka ve ntama mingi. Beno me mona? Yinga, yinki samu na bayina kwendaka ntama mingi ve?

⁹⁸ Ntangu yayi, beto kuzwaka bantu yina kotaka na nzutu, mpe kwendaka na nzila ya yimbi. Mpe—mpe Nzambi ve, kasi bantu kwendaka. . . Samu na lutwadusu ya mbote ve, mpe nionso yina, ba kwendaka na nzila ya yimbi mpe kotaka na bufanatiki. Na manima yinza ya muvimba, diabulu ke talisa bawu, “Tala yina! Tala yina!”

⁹⁹ Mbote, bika mu telama na suka yayi mpe mu talisa na makumi yayi ya mafuku ya bambala kulutila ti ya me bandaka ntete ve. Yinki samu na bawu? Beno me mona, beno tala mutindu ya bawu. Beno tala mwana-bakala mutindu Eichmann bubu yayi, na yina ya kulutila nene. . . Ba ke tuba, “Ba-pentecotiste kele na bumuntu ve mpe ba kele na mvwandulu ya mbote ve, mpe ba me longokaka,” mpe nionso yankaka mutindu yina. Beno tala Eichman, mosi ya babakala yina me longokaka mingi na yinza. Mpe yandi kufwaka, bana mafuku sambanu mpe bakento mpe babakala, mafuku sambanu ya mioyo. Beno ke zola ve kutalisa muntu ya mutindu yina.

¹⁰⁰ Kasi mwa bampangi yina lendaka ve kutanga, na mpasi, ba vwandaka bokila ntangu yankaka bankumbu ya Biblia mbote ve, mpe, to ntangu yankaka ba tubaka kima mosi to salaka kima ya yimbi, to salaka mwa kifu, bazulunale ke zola kusonika yawu bisika nionso, mpe ba ke tuba, “Ba lendaka ve kutula kivuvu na bawu.”

¹⁰¹ Na yina kana ba lendaka ve kutula ntima na yawu, samu na yinki ve malongi, bima mpe bantu ya mayele yina ba ke na yawu bubu yayi? Beno tala Adolf Hitler. Beno tala mayele ya yinza bubu yayi. Beno tala bawu. Nzonzolo ya ntama, “Supu ya dibata ya kento kele samu na dibata ya bakala.”

¹⁰² Kima beno fwana sala kele kuvwanda na kiyeka, na nzila ya Mpeve-Santu, samu na kukabula yina kele mbote mpe yimbi, mpe kubaka yina kele mbote mpe yimbi.

¹⁰³ Ntangu yayi, beto ke mona ti Calvaire yayi ba vwandaka na yawu, mpe bamasa ya luzingwa ke basika samu na bantu.

¹⁰⁴ Ntangu yayi, bantu yankaka kele na zulu ya bantima ya bawu mpe mabanza ya bawu, ti Israel nionso kunwaka masa, mpe na manima ba kangaka bakamela mpe kangaka bansinga na bampunda ya bawu, mpe nionso yina, mpe ba bakaka bana ya bawu mpe salaka nzietolo na kisika yankaka, mpe bikaka Ditadi kuna, ke basisa masa. Yina kele kifu.

¹⁰⁵ Ditadi yina landaka bawu, mpe masa yina landaka bawu. Ntangu yayi na ba-Corinthiens ya Ntete, kapu 10, mu banza, mpe nzila ya 11, beno lenda mona yawu, ti “Ditadi yina landaka Israel.” Kisika nionso ba vwandaka kwenda kubanda

kilumbu yina, Ditadi vwandaka kwenda na bawu, mpe bamasa landaka bawu.

¹⁰⁶ Yinki mbandu yayi ya kitoko mpe kisika ya kitoko ya kusimba mpe longo samu na mukwikidi bubu yayi, yina ke zaba ti ba bulaka Ditadi yina mbala mosi, ti Masa yina basikaka mbala mosi na Calvaire, ke tambula na beto bisika nionso beto kele! Oh, la la! Ya ke vutuka ve na kisika mosi, mpe ke tuba, “Mbote, beto vwandaka na Masa mazusi, kuna.” Beto kele na Masa bubu yayi, awa kaka, samu Ditadi yina vwandaka Klisto! Mpe Klisto kele mutindu mosi mazono, bubu yayi, mpe kukonda nsuka.

¹⁰⁷ Beno me mona, Ditadi yina landaka Israel. Ba vwandaka landa Ditadi ata fioti ve, kasi Ditadi vwandaka landa bawu. Amen. Israel kwendaka na nzietolo ya bawu. Ba vwandaka kaka na kima mosi ya kusala, ya kele, kubikala kaka nzila ya kieleka, ya kusungama na yinsi ya nsilulu. Mpe Ditadi mpe masa vwandaka landa bawu.

. . . *Ditadi vwandaka landa bawu:* . . .

Ba-Corinthiens ya Ntete ke tuba na beto mutindu yina, na kapu ya 10. Mbote mingi.

. . . *Ditadi yina vwandaka Klisto.*

¹⁰⁸ Nzambi bakaka balusambusu ya bantu mpe tulaka yawu na zulu ya Klisto, mpe bulaka Yandi. Beno me bakula, ya vwandaka na mpwasa na kati ya Ditadi, kubanda ntangu yina? Ditadi vwanda na mpwasa na kati ya yawu, kisika Moise bulaka. Mpe Klisto vwandaka na mpwasa, ntangu ba bulaka Yandi, “Yandi lwalaka samu na masumu ya beto, mpe na bamputa ya Yandi beto me beluka.” Na Luzingu yina basikaka Bamasa ya Luzingu yina beto ke sepela na yawu mingi bubu yayi!

¹⁰⁹ Ntangu yayi, samu na kubaka Luzingu yayi, beno bambuka moyo, Luzingu ya Klisto ke vwanda na Dibundu. Alleluia! Oh, kana beto lendaka kotisa mabanza ya beto kuna baminuti kumi yina ke landa! Klisto me bika Dibundu ve. “Mu ke vwanda na beno ntangu nionso, ata mpe tii na nsuka ya yinza.” Ya kele bantu yina ke bikaka Klisto, Klisto ve ke bikaka bantu. Bantu ke bikaka Yandi, na nzila ya kukondwa lukwikilu. Ba ke bikaka Klisto, Klisto ve ke bikaka bantu.

¹¹⁰ Israel bikaka masa, masa ve bikaka Israel. Beno me mona? Na yina, na pwelele Biblia ke tuba ti, “Ditadi mpe masa landaka Israel.” Ya landaka bawu! Bisika nionso bawu kwendaka, Yawu kwendaka, mpe.

¹¹¹ Oh, mu ke zola, na suka yayi, kana beto vwandaka na ntangu, kubaka kapu ya 1 ya Josué, kisika Yandi me tuba, “Kisika nionso bitambi ya beno ke diata, Mu me pesa yawu na beno. Bisika nionso beno ke kwenda, Mfumu Nzambi ya beno kele na beno. Beno vwanda na boma ya muntu mosi ve. Beno vwanda na

kikesa! Kaka kisika nionso beno ke diata, Mu ke vwanda kaka kuna na beno, ya vwanda konso kisika yina.” Nzambi vwandaka tambula na Josué!

¹¹² Nzambi yina mosi ke tambula na Dibuundu ya Yandi na suka yayi. Beto kunwa na Yinto yina kuna. Kisika nionso beno ke diata, ya kele kisika yina Nzambi ke vwanda kaka na beno, samu na kumwangisa masa kuna mpe kupesa beno Luzingu. “Mu ke vwanda na beno ntangu nionso, tii na nsuka ya nsungi.” Klisto mutindu mosi mazono, bubu yayi, mpe kukonda nsuka. Misiku ya Nzambi.

¹¹³ Ntangu yayi beno ke tuba, “Na yina, Mpangi Branham, samu na yinki beto ke sala ve bima yina beto lendaka sala? Wapi mutindu makabu ya beto mpe bima na dibuundu ke baka ve ntinta ya yawu, na kisika yina ya zolaka vwanda? Wapi mutindu dibuundu ya beto ke mata ve na kisika yina ya zolaka vwanda?” Bantu, na ntangu ya kumekama, ke basika na nzila mutindu Israel salaka. Ba ke banza ti Nzambi me bika bawu.

¹¹⁴ Kasi, beno bambuka moyo, Ditadi bikaka ata fioti ve Israel. Israel bikaka Ditadi, ya zimbanaka ti Ditadi kele na bawu ntangu nionso. Ya vwandaka kaka kuna, kwendaka na bawu kaka tii na nsuka ya nzila. “Ya landaka bawu.” Ya vwandaka ve ntama ya nzonzolo. Ya vwandaka ve ntama ya kiwidi. To, ya vwanda ve ntama ya kumona.

¹¹⁵ Mpe Klisto ve! Na Dibuundu bubu yayi, Yandi kele ve ntama ya nzonzolo. Bayankaka na kati ya beno me vutuka na manima, mpe me sala yina kele mbote ve, mpe beno me zimbisa kiese yina, mpe Masa ya beno me kuyuma. Yandi kele kaka ntama ya nzonzolo ya beno. Yandi ke landa beno. Yandi zaba konso movuma beno ke sala mpe bima nionso beno ke sala. Yandi ke vingila kaka kuwa beno bokila Yandi na kisalu.

¹¹⁶ Mpe movuma yayi ya nene ya Pentecote bubu yayi, Nzambi ke na kuingila beno bokila Yandi na kisalu. Beno kele ve ntama na nzonzolo na Yandi. Ata ti beto me sala yimbi, mpe me sumuka, mpe me balula mikongo ya beto na Yandi, mpe—mpe me sala bima yina beto zolaka sala ve, kasi Yandi kele kaka na beto. Klisto tubaka ti Yandi ke vwanda na beto.

¹¹⁷ Biblia tubaka, “Bamasa vwandaka landa bana ya Israel.” Ntangu ba vwandaka na mpwila, ba zabaka ti masa vwandaka pene-pene.

¹¹⁸ Ntangu yayi, bima yayi me twadisama na misiku. Ba-systeme nionso ya Nzambi me tulama na nzila ya misuku. Ntangu yayi beto ke baka. . . Beto vingila fioti.

¹¹⁹ Beto baka yinza. Ya ke baluka, na bangunga makumi zole na yiya nionso ya ke baluka ya movimba, na mutindu ya kulunga, ti. . . Beto vwandaka na kiyeka ata fioti ve, na ba-science ya beto nionso, na kusala montele mosi samu na kukeba ntangu

ya kulunga. Na ntangu nionso, bamontele ya kulutila kitoko ba ke sala ata fioti ve, na kati ya mvula, ke kuzwa to ke zimbisa minuti mingi. Kasi yinza ke kubwa ata fioti ve kasi ya kele kaka kuna na sekonde. Ya kele ya kulunga mingi ti bantu ya science bubu yayi, bantu ke tangaka bambwetete lenda tuba na beno, na ntwala bamvula makumi zole to na ntwala bamvula makumi tanu, kieleka mwini mpe ngonda ke lutana mosi na yankaka. Ntangu ya ke baluka baselekele ya yawu makumi zole na yiya, mpe ya ke baluka ntangu ya yawu pene-pene ya orbite samu na nsungi mosi, ya ke kondwa ve tiki mosi. Alleluia! Ya kele ya kulunga, samu ya ke tambula landila musiku ya Nzambi.

¹²⁰ Bawu zaba kaka kieleka ntangu marée yina ke kusuka, tii na minuti, samu bawu zaba yinki ntangu ngonda ke kubwa. Mpe Nzambi me tulaka bima nionso na ndonga na nzila ya musiku. Mpe ntangu ngonda yina ke dinda, marée ke kwenda na yawu. Ntangu ngonda yina ke basika, tala marée ke kwisa na yawu. Mpe ba me zaba kieleka, na nzila ya ntangu, ntangu ngonda yina ke dinda. Ba lendaka tula yawu na manaka ya almanac bamvula mingi na ntwala, mpe kutuba na beno, na minuti, ntangu marée yina ke banda na kubwa. Ya kieleka, samu ya kele mutindu yina ngonda ke basikaka, samu ya me vwanda landila musiku ya Nzambi.

¹²¹ Mu vwandaka ya kutelama, kilumbu yina, pene-pene ya Dizanga ya Michigan. Mpe mu kwendaka kuna na Dizanga ya Supérieur, mu vwandaka kwenda na Canada, nzutu yina ya nene ya masa. Mpe mu telamaka kuna, mpe mu banzaka, “Bitamina yikwa ya kele kuna masa yayi ya nene ya kusungama awa!” Mpe na yina na manima mu zabukaka Mich- . . . to Dizanga ya Supérieur, mu zolaka kwisa na Michigan, kaka plan mosi ya masa ya mutindu mosi. Mpe kuna, katuka Dizanga ya Supérieur tii na Dizanga ya Michigan, katuka Dizanga ya Michigan tii na Dizanga ya Ontario, mpe kaka. . . mpe Huron, mpe mazanga nionso kintwadi. Wapi mutindu bambala makiasa na makiasa, mpe ba-baril mingi ya masa ya madidi me vwanda na kati ya dizanga yina!

¹²² Mpe kuna na Nevada, mpe na Arizona, na New Mexico, na Este ya Californie, me vwanda mafuku ya ba-hectare ya bisika ya kuyuma, ke zikisa ntoto. Ya kele ya lubutu mingi ti, kana masa yina lendaka kuma na ntoto yina, yinsi yayi lendaka kudisa yinza, kukondwa ata bantu ya nzala, mpe kuzwa ya kulutila samu na kulosa na masa. Ya kieleka! Mafuku ya ba-hectare yina lendaka zolaka basisa ba-tonne ya mafuku ya ba-tonne ya bambala mpe choux, mpe madesu mpe—mpe saladi, mpe radis mpe celeri, mpe cocombre, mpe yina yankaka. Ntoto ke basisa yawu, ya ke—ya ke vingila kaka masa.

¹²³ Mpe masa yawu yayi *awa*, mpe ntoto yawu yayi *awa*. Ntangu yayi beto lenda mona yawu, mpe beto zaba ti ya ke sala yawu,

samu beto lenda meka masa mpe kumona ti ya kele madidi, mpe kumeka ntoto mpe kumona ti ya kele ya lubutu. Ntangu yayi, kivuvu nionso yina beto lendaka tula, ke tula bawu kintwadi ata fioti ve. Kasi, ya kele na musiku, mpe musiku yina kele ngolo yina ke bendaka. Ntangu yayi, kana beto ke sala landila ngolo yina ke bendaka, beto lendaka mwangisa masa na konso kitini ya ntoto yina, kubaka masa na mazanga mpe kumwangisa na yawu. Kasi beto fwana sala landila musiku ya ngolo yina ke bendaka. Beto lenda ve kuzola yawu na nganda kuna. Beto lenda ve kubokila yawu na nganda kuna. Beto lenda ve kusadila yawu makelele na nganda kuna. Beto fwana sala landila misiku ya ngolo yina ke bendaka, samu na kuzwa yawu kuna. Nzambi me tula bima nionso na musiku.

¹²⁴ Na yina, mu vwandaka banza, mu zaba ve kana mu me tubaka na beno yayi, to ve. Mu vwandaka kuna na Kentucky, na kuzomba bampadi, na Mpangi Wood, pene ya mvula mosi me luta. Mpe beto . . . Bampadi vwandaka monana ve, mpe na yina beto kwendaka kuna na yinzo ya mpangi mosi, samu na kuzaba na yina me tala kuzomba. Bakala mosi vwandaka na ba-hectares mingi ya ntoto, mpe na ntoto yayi ya vwandaka na bayinti mingi. Kasi Mpangi wood tubaka na munu, ti, “Bakala yango kele mumpuni. Yandi kele—yandi muntu ya kukondwa lukwikilu ve.” Na yina yandi tubaka ti yandi zabaka yandi, na yina yandi. . . to tata ya yandi zabaka yandi, yandi zolaka kwenda kuna mpe kuyufula kana beto lendaka kuzwa muswa samu na kuzomba.

¹²⁵ Beto kwendaka na sika ya batata yango. Mpe yandi mpe bakala yankaka, bawu zole vwandaka na bamvula makumi sambwadi, ba vwandaka ya kuvwanda na nsi ya yinti ya bapomme. Mpe Tata Wood kwendaka na sika ya bakala yayi, mpe yandi tubaka na yandi, “Mu lendaka zomba fioti na kisika ya nge?” Mpe yandi tubaka, “Mbote,” yandi tubaka, “mbote mingi.” Yandi tubaka, “Wapi Wood nge kele? Nge kele mwana ya Jim Wood?”

Yandi tubaka, “Ya kele mutindu yina.”

¹²⁶ Yandi tubaka, “Mbote, kiboba Jim vwandaka ya kusungama, mpe nionso yina.” Yandi tubaka, “Nge lenda zomba bisika nionso nge me zola, na kisika ya munu. Mu kele na ba-hectares *mingi* awa, sala yina nge me zola. Kwenda kuna ba ke boka, bisika nionso nge me zola. Sala kaka ti nge kele na yinzo ya nge.”

¹²⁷ Mu vwandaka na kati ya tomabilu, samu mu banzaka ti longi na mumpuni ke wisana ve kintwadi, kana beto zolaka lomba lemvo ya mumpuni.

¹²⁸ Na yina na manima ya mwa ntangu fioti, Mpangi Wood tubaka, “Mbote, ntangu yayi, mu lendaka kwenda na pasteur ya munu? Mu banza ti ya ke vwanda mbote mingi samu na yandi na kukwisa kintwadi na munu.”

129 Mpe bakala yayi ya kiboba vutukaka na nkawa ya yandi, mpe yandi tubaka, “Wood, nge zola tuba na munu ti nge me kulumuka na nsi mingi, ti nge fwana vwanda na longi bisika nionso nge ke kwenda?”

130 Mpe na yina, mu banzaka, na manima ya yina, mu ke sala mbote na kubasika na tomabilu. Na yina mu basikaka na tomabilu, mpe tubaka na bakala yango ya kiboba na baminuti fioti. Mpe yandi bikaka munu zaba kaka na nswalu nionso ti yandi me salaka mingi ve na balongi, samu yandi banzaka ti ba vwandaka tubila kima yina ba me zaba ve.

131 Yandi tubaka, “Ba ke niunguta kaka kima yina ba me zaba ve. Mbote,” yandi tubaka, “ntangu bakala mosi ke tuba na munu, mu ke zola yandi zaba yina yandi ke na kutubila.” Ntangu yayi, yina ke dibanza ya mbote. Yina ke dibanza ya mbote. Yandi tubaka, “Ntangu yayi, kana bakala mosi ke tuba na munu, mu ke zola ve yandi tubila mwa *kima mosi yankaka*, kubanza ti yandi me zaba kima mosi ve. Mu ke zola yandi tubila kima yina yandi zaba yina yandi ke tubila.” Mbote, mu me zitisa yawu. Mu me zitisa yina na kati ya kiboba yayi ya bakala.

132 Mpe na yina mu tubaka, “Mbote, ya kieleka, konso muntu ke na dibanza ya yandi.”

133 Mpe yandi tubaka, “Ya vwandaka na longi mosi yina kwisaka awa na yinsi yayi, mwa bamvula fioti me luta, yina vwandaka na lukutakanu kuna na Acton.” Mpe yandi tubaka, “Longi yayi, na nkokila mosi, ya vwandaka nzenza na yinsi yango, tubaka na mama yina vwanda ya kuvwanda na kati ya nkonga ya bantu, ‘Nge kele na muswale na pokosi ya nge. Mpe nge kele Mama *Kingandi*. Mpe nge kele na mpangi-kento ya mbevo na zulu ya mongo awa. Nkumbu ya yandi kele *Kingandi*. Yandi ke na kufwa, na cancer na estomac.’ Mpe yandi tubaka, ‘Baka muswale yayi mpe tula yawu na zulu ya mpangi ya nge ya kento, mpe tuba na yandi, “MUTINDU ME TUBA MFUMU, yandi ke kufwa ve, kasi yandi ke zinga.”’”

134 Yandi tubaka, “Kento yango vwandaka nkundi ya beto.” Mpe yandi tubaka, “Beto bakaka kento yayi. . . Tulaka muswale yayi na zulu ya yandi; to bakala yayi, na muntu yango.” Ntete yandi tubaka, “Kento yayi, kento ya munu mpe munu vwandaka kuna na suka yina mpe bakaka, vwandaka vingila kento yayi. Mpe yandi vwandaka ya kubela mingi! Badokotolo bikaka yandi, ntama mingi ve. Yandi vwandaka ya kubela mingi ti beto zolaka nata yandi na bulanketi, beto kuzangula yandi samu na kutula yandi na zulu ya bassin hygiénique, kuvutula yandi. Kubalula yandi na bulanketi, yandi vwandaka ya kubela mingi.” Yandi tubaka, “Na nkokila mosi, kuna, makelele mosi wakanaka mutindu ba vwandaka na muntu mosi me kufwa.”

135 Ya vwandaka Ben kuna, na muswale yina, ya vwandaka baka yawu kuna. Mu banza ti ya vwandaka nge, mutindu yina ve,

Ben? [Mpangi Ben Bryant me tuba, “Amen. Amen.”—Mu.] Ya vwandaka Mpangi Ben kuna, ke baka muswale yina, samu yandi nataka kento yango kuna.

¹³⁶ Mpe yandi tubaka, “Na suka yina landaka, yandi vwandaka kudia tarte ya pomme ya frite.” Mpe yandi tubaka, “Yandi salaka kaka ve kisalu ya yandi mosi, kasi yandi salaka kisalu ya mfinangani ya yandi. Yandi vwandaka mbote mingi!” Yandi tubaka, “Ntangu yayi mu ke kumiyufulaka mbala mingi. Kana mu lendaka mona longi yina, yandi zabaka yina yandi vwandaka tuba,” yandi tubaka, “Mu—mu ke zola solula na yandi.”

¹³⁷ Mpangi Wood talaka munu, mpe mu talaka yandi. Beto vwandaka ya kutelama kuna, mvindu, mpe na mutoki mpe nzanzi, beto vwandaka zinga na tenta na kati ya bamfinda, mpe—mpe menga nionso ya bampadi na zulu ya beto. Mpe na yina mu tubaka, “Mbote,” mu tubaka, “kele. . . Nge zola tuba ti nge lendaka tuba na muntu yayi mpe yandi ke tuba na nge wapi mutindu yandi salaka yawu?”

Yandi tubaka, “Yinga, tata, yawu yina mu zola tuba.”

Mu tubaka, “Mbote, ya kele—ya kele kima ya mbote.”

¹³⁸ Mu vwandaka kudia mosi ya ba-pomme ya yandi. Mwa jacket ya ntama ya mwamba vwandaka na zulu ya bawu kuna, beno zaba, na automme ya mvula, na Ngonda ya nana. Na yina mu vwandaka na mwa pomme yayi, mpe mu vwandaka kudia yawu. Mpe mu tubaka, “Yayi kele pomme ya kitoko mingi.” Mu tubaka, “Yinti yina ke na bamvula yikwa kuna?”

¹³⁹ “Oh,” yandi tubaka, “Mu kunaka yinti yina kuna, bamvula makumi tatu to makumi yiya me luta, to kima yankaka.”

¹⁴⁰ “Yinga, tata.” Mu tubaka, “Mu ke zola kaka kuyufula nge kiuvu mosi.” Mu tubaka, “Wapi mutindu na yinza. . . Mu ke mona ba-pomme yina me kubwa na yinti yina, mpe matiti ya yawu ke na kubwa, mpe awa ya kele kaka na kati-kati ya Ngonda ya nana.” Mpe mu tubaka, “Beto kele ata na mpusu ya mubisu ve, beto kele ve na gel to kima mosi ve, mpe diaka matiti ke na kubwa na yinti yina. Samu na yinki ya ke mutindu yina?”

Yandi tubaka, “Masa ya yinti me bika yinti.”

“Oh,” mu tubaka, “wapi kisika ya me kwenda?”

Yandi tubaka, “Ya me kulumuka na bansimbulu.”

Mpe mu tubaka, “Na yina ya ke vwanda kuna bantangu yikwa?”

Yandi tubaka, “Tii na printemps.”

¹⁴¹ Mpe mu tubaka, “Na yina ya ke vutuka, mpe ya ke nata matiti ya malu-malu samu na kivudi, ba-pomme ya malu-malu samu na kudia.”

Yandi tubaka, “Ya kieleka. Ya kieleka mutindu yina.”

142 Mu tubaka, “Mbote, mu zola yufula nge kima mosi, tata. Nge ke tubila bantu yayi me zaba ve yina ba ke tubila.” Mu tubaka, “Beno lendaka tendula na munu yinki Mayele yina ke sala ti masa ya yinti kubika yinti yina? Kana ya zolaka vwanda kuna na hiver, yinti zolaka kufwa. Beno zolaka kufwa yinti. Germe ya luzingu kele na kati ya masa ya yinti yina.” Na yina mu tubaka, “Ya zolaka kufwa yinti. Wapi Mayele yina ke sala ti masa ya yinti yina kukatuka na yinti yina, ya kulumuka na bansimbulu, mpe kuvwanda tii na printemps, na manima ya ke vutuka diaka mpe ke nata mwa ba-pomme yankaka?” Mu tubaka, “Tula masa na kati ya kantini mpe tula yawu na zulu ya yinti, mpe tala kana, na Ngonda ya nana, ya ke kulumuka na nsi ya yinti mpe ke vutuka na printemps. Beno me mona?” Mu tubaka, “Ya kele na musiku mosi, ya kele na musiku ya yinza. Mayele mosi ke tula musiku yayi na ndonga. Yina kaka ve, kasi Mayele yina mosi fwana sadila musiku yina, yina ke nata yawu na kati ya nsimbulu ya yinti, mpe ke kwisa vutuka.”

Yandi tubaka, “Mu me banzaka yawu ata fioti ve.”

143 Mu tubaka, “Beno lenda . . . Kana beno lenda mona Mayele yina ke sala ti masa ya yinti yina kukatuka na mavala ya yinti yina, kukulumuka na bansimbulu mpe kuvutuka, ya kele Mayele yina mosi tubaka na munu kuna na nkokila yina, ‘Kwenda, tula muswale yina na zulu ya kento yina.’”

Yandi tubaka, “Mpe nge kele longi yango?”

Mu tubaka, “Yinga, tata, ya kele kieleka.”

144 Na mvula me luta mu vwandaka kuna (yandi me kwenda), mpe ntangu mufwidi ya yandi vwandaka ya kuvwanda na velanda, ke katula mpusu na ba-pomme, na yinti yina mosi. Mpangi . . . Ntete ba zolaka basisa beto na nganda, ba zabaka ve nani beto vwandaka. Mpe mu kwendaka mpe tubaka yawu na yandi, ti beto kuzwaka muswa na yandi. Mpe mu tubaka na yandi yawu, mu tubaka, “Yandi ndimaka kieleka Klisto na ntwala yandi kufwa.”

145 Beno me mona, yinki yinti yina ke sala, wapi Mayele ke kulumuka kuna? Ya kele musiku. Ya kele musiku yina Nzambi me tula na ndonga. Mpe musiku yina kele musiku ya Nzambi yina ke keba muntu. Amen.

146 Beno zaba, mu ke kipe wapi mutindu beno ke boka, mpe ke tuba—ke tuba ntangu yayi, “Ya ke salama ve, mwini ke sema diaka ve na été yayi.” Ya ke sema, na mutindu nionso. Wapi mutindu beno ke tuba, “Mu—mu—mu ke bika ve nkokila kukwisa.” Ya ke kwisa, na mutindu nionso. Samu kima yayi wapi beto ke na kuzinga, yina ba me bokila yinza, me twadisama na musiku ya Nzambi.

147 Ntangu yayi, bampangi-babakala mpe bampangi-bakento, mu ke zola kuyufula beno kima mosi. Na yina, kana beto

me butuka mbala ya zole na Mpeve ya Nzambi. . . Nzambi ke vwandaka ve na bitini ya kulemba mpe bitini ya ngolo mingi, Yandi kele kaka Nzambi! Mpe kana beno vwandaka na Nzambi mingi na kati ya beno, ti Ya lendaka vwanda kaka kivudi, yina kele ngolo ya mingi samu na kusala ntoto ya malu-malu. Yina kele ngolo ya mingi samu na kusala ngonda ya malu-malu mpe systeme ya malu-malu. Ya kele Nzambi, mpe ya kele ngolo! Mpe kaka na ntangu yayi mukwikidi nionso na kati awa kele na Luzingu ya Kukonda nsuka, yina kele, Mpeve ya Nzambi na kati ya beno; Ngolo ya mingi yina ke vumbula bamvumbi, yina ke belusa bambevo, yina ke tula ba-orbite ya kusungama. Kasi beno, ya me twadisama na musiku, Mpeve yina kele na kati ya beno. Beno kele bana-babakala mpe bana-bakento ya Nzambi. Mpeve yina mosi kele na kati ya beno, ke vumbula beno na kilumbu ya mvumbukulu.

¹⁴⁸ Yesu, ntangu Yandi vwandaka awa na zulu ya ntoto, ntangu Yandi kufwaka, moyo ya Yandi kulumukaka na Difelo, “Mpe longaka na bampeve yina vwandaka na boloko, mioyo na boloko, yina balulaka ntima ve na bilumbu ya mvibudulu ya Noé.” Nzutu ya Yandi kwendaka na ntoni. Kasi na ntuala Yandi kufwa, Yandi pesaka Mpeve ya Yandi na maboko ya Nzambi. Mpeve ya Yandi kwendaka na Nzambi; moyo ya Yandi kwendaka na Difelo; mpe nzutu ya Yandi kwendaka na ntoni. Mpe Yesu vwandaka na nganda ya mvumbukulu tii Masonuku lendaka kulunga. Yandi lendaka vutuka ve, samu Yandi vwandaka na ntoni bilumbu tata mpe bampimpa tatu. Kasi ntangu Masonuku nionso lungaka, kibaka yayi katukaka; Mpeve ya Yandi kulumukaka na moyo ya Yandi, moyo ya Yandi na nzutu ya Yandi, mpe Yandi vumbukaka diaka.

¹⁴⁹ Mpe ntangu beto ke kufwa, mioyo ya beto ke kwenda na nsi ya autel ya Nzambi; kisika mu vwandaka na bweso ya kumona, na mwa basuka fioti me luta, mutindu beno me zaba, na vision, kisika Biblia me tubila yawu, “Bampeve ya beto ke kwenda na Nzambi Yina pesaka yawu, mpe banzutu ya beto ke vutuka na putulu ya ntoto.” Kasi kilumbu mosi, ntangu Masonuku ke lunga, bampeve ya beto ke basika na Nzambi, ke baka moyo, mpe moyo na nzutu. Mpe Ngolo yina ke vumbula beto, kele kaka na kati ya beto na ntangu yayi! Beto kele ntangu yayi na bisika ya Mazulu. Beto kele ntangu yayi kati na Ngolo ya mvumbukulu.

¹⁵⁰ Kana ya vwandaka na musiku ve samu na yawu, bana-babakala mpe bana-bakento ya Nzambi ke sadila bawu yinza awa mpe ke kwenda zinga luzingu ya kingenga na zulu ya yawu. Beno kele na Ngolo na kati ya beno samu na kusala yawu. Kana beno kele na kivudi ya Ngolo ya Nzambi na kati ya beno, beno kele na Ngolo samu na kusala yawu. Nzambi kele yina kele bisika nionso. Beno me mona yina mu zola tuba? Ngolo yina kele na kati ya beno ke sala. Beno lendaka bokila yinza na luzingu mpe kukwenda zinga na zulu ya yawu. Alleluia! Yawu yina.

151 Yawu yina Ngolo kele na kati ya Dibuundu ntangu yayi, kasi ya me twadisama na musiku. Mpe musiku yango kele ve “kuzitisa kinkuku ya misiku.” Ya kele musiku ya lukwikilu. Yesu tubaka, “Bima nionso ke salama na bayina ke kwikila.” Mpe kana beno lenda kwikila yawu, nionso yina Nzambi ke twadisa moyo ya beno na kukwikila, ya kele ya beno. Kisika nionso bitambi ya makulu ya beno ke diata, na lukwikilu, Nzambi me pesa yawu na beno. Amen! Ya kele ya beno, beno me kuzwa yawu, kana beno lenda mona fungula na musiku yayi ya lukwikilu yina ke zibula yawu samu na beno. Beno me mona yina mu zola tuba? Ngolo yina me twadisama na . . . Kana beno kele mwana-bakala ya Nzambi, beno kele mwana-kento ya Nzambi, yina ke bika beno ata fioti ve. Ya kele na beno ntangu nionso. Kasi, lukwikilu ya beno me kwenda ntama na Yawu, kasi Ya kele kaka kuna. Alleluia!

152 Ntangu beno me vuluka, Nzambi ke pesa beno lukwikilu samu na kuvumbuka na mvindu ya ntoto. Lukwikilu ya beno ke nunga bima ya yinza. Yinki kele lukwikilu ya beno? Lukwikilu ya beno na kusalu yina Nzambi me sala na kati ya beno, samu na kusala beno mwana ya Nzambi. Beno ke bika luvunu ya beno, beno ke bika muyibi ya beno, beno ke bika kunwa malafu ya beno, samu lukwikilu ya beno me vumbula beno na zulu ya yawu. Amen. Kana beno sala yawu ve, beno ke na lukwikilu ve. “Mpe na lukwikilu beno me vuluka, mpe yina na nzila ya lemvo.”

153 Mutindu mosi lukwikilu ya beno ke basika na kimpwanza, ya kele Ngolo yina beno lenda vwanda na yawu, samu na kati ya beno me vwanda Ngolo samu na kusala Mazulu mpe ntoto. Nzambi kele na kati ya beno, mpe beno kele bana-babakala mpe bana-bakento ya Nzambi. Amen! Yawu yina. Kasi, ya kele lukwikilu ya beno. Yesu tubaka, “Landila lukwikilu ya beno, vwanda mutindu yina. Kana beno lenda kwikila ve, bima nionso ke salama. Ya kieleka, mu ke tuba na beno, kana beno tuba na mongo yayi, ‘Katuka awa,’ mpe beno ke tula ntembe ve, kasi beno ke kwikila yina beno me tuba!”

154 Na yina wapi mutindu ya bantu, beto zolaka vwanda, na kuvwandaka na lukwikilu na Klisto yayi ya nene ya mpulusu yina ke zinga na kati ya beto, Ditadi yayi ba me bula yina ke bika Dibuundu ata fioti ve? “Mu kele na beno ntangu nionso, ata mpe tii na nsuka ya yinza,” Mvwandulu ya ntangu nionso ya yinto ya nene ya mpulusu mpe Ngolo yina basikaka na Calvaire kotaka na Dibuundu, Mvwandulu ya ntangu nionso ya Nzambi ya moyo, yinto ya nene, Ditadi yina ba me bula yina ke tambula na beto na nzietolo ya beto.

155 Israel zimbisaka lukwikilu. Ba basikaka na nzila. Ba bandaka na kulula bisika ya bamadia ya kimvuka. Kana ba zolaka bikala na lukwikilu, mpe kukwikila ti Nzambi zolaka nata bawu na yinsi, ya zolaka vwanda na kima mosi ve samu

na kukanga bawu nzila. Ba vwandaka me zibula ntete bamubu, ba vwandaka me bula bampasi na zulu ya bambeni ya bawu, ba vwandaka me koma na kulunsi bambeni ya bawu na manima ya bawu, mpe vwandaka tambula kuna na yinsi, mpe kasi ba lendaka ve kuvwanda na lukwikilu samu na kukuma na nsilulu.

¹⁵⁶ Josué mpe Caleb vwandaka na lukwikilu! Ba tubaka, “Beto kele na kiyeka ve samu na kununga kima nionso yina ke kwisa na ntwala ya beto.”

¹⁵⁷ Yawu yina kele mpasi na dibuundu. Beto lenda nunga konso kimbevo. Beto kele na Ngolo na kati ya beto. Beto kele bana-babakala mpe bana-bakento ya Nzambi, kima mosi ve lenda telama na ntwala ya beto. Kima mosi kaka, Yandi zola kuzwa muntu mosi yina ke kwikila yawu, yina ke kwikila yina Nzambi me salaka yimeni samu na beto. Ya kele ve beto *ke* vwanda; beto kele ntangu yayi! Mpe Mwandulu ya ntangu nionso ya Mpeve kele na beto. Amen! Yawu yina.

¹⁵⁸ Yawu yina mu ke zola tubila ntangu mu tubilaka dilongi yayi na suka yayi, *Masa Ke Basika Ntangu Nionso Na Ditadi*. Masa yina ke basika ntangu nionso na Ditadi kele awa na ntangu yayi, Masa yina ke basika ntangu nionso na Ditadi yina ba bulaka na Calvaire. Ntangu Mpeve-Santu yina basikaka na Yandi na Calvaire, yina me vutuka na Dibundu na Kilumbu ya Pentecote, Mpeve-Santu yina mosi kele awa na suka yayi. Mpe Ya ke pesa beto nsilulu!

¹⁵⁹ Yawu yina, mu ke tambula na ntwala ya bambevo, ntangu Yandi me tuma munu kuna, mu ke kwikila yawu; Nzambi me tuba mutindu yina! Ya kele mutindu yina ba-vision ke kwisaka; Nzambi silaka yawu! Nzambi lenda vuna ve.

¹⁶⁰ Beno kwikila yawu! Beno fwana kukwikila yawu. Ya fwana vwanda na Kima mosi kuna, beno zibula kifinuku yina, beno zibula kima yina samu beno kukuma na yawu. Yina beto ke na yawu nsatu bubu yayi kele ve kusambila na Ngolo ya mingi. Beno kele na Ngolo mingi samu na kusala ntoto ya malu-malu. Yina beno ke na yawu nsatu kele lukwikilu samu na kusadila Ngolo yina. Yina beno ke na yawu nsatu kele kuyala luzingu yina, mpe kuzinga luzingu ya busantu, ti ntangu beno ke lomba Nzambi kima mosi, beno me zaba! Beto ke tula kivuvu na Nzambi, samu na yawu. Beto me zaba, kana beto ke zitisa Misiku ya Yandi, Yandi ke manga ve na kupesa beto kima ya mbote, kana beto ke tambula na Yandi. Nzambi ke tambula na beto. Oh, la la!

¹⁶¹ Ba vwandaka kaka na kima mosi ya kusala. Ba vwandaka kaka na kima mosi ya kusala, ya kele, kubikala ya kusungama na nzila. Ya kele ve kuwaya-wayi *awa*, mpe kuwaya-wayi *kuna*; kasi kubikala na nzila! Dibundu kele kaka na kima mosi ya kusala, kubikala na nzila! Ba vwandaka na Dikunzi ya Tiya, yina ba vwandaka na yawu, samu na kukeba bawu na nzila na kulandaka Dikunzi ya Tiya yina. Yawu yina twadisaka bawu.

Kima ya bawu ba lendaka mona, vwandaka Dikunzi ya Tiya yina. Ba monaka Yawu ke sala na nzila ya Moise, mpe bawu zabaka ti yandi vwandaka ntwadisi.

¹⁶² Bubu yayi beto kele na Ndinga. Beto ke landa Ndinga. Mpe beto ke mona Ndinga ke sala na kati ya mikwikidi, mpe beto zaba ti ya ke mutindu yina, kuna. Nzambi ke sala na beto, na kusiamisaka Ndinga na bidimbu ke landa! Beto ke bikala na Ndinga. Ndinga ke pesa bamvutu.

¹⁶³ Ba vwandaka na Moise. Samu, Dikunzi ya Tiya, Moise vwandaka landa Yawu. Mpe ba vwandaka landa. Ntangu ba bandaka na kukolama na Moise, mpe swanisaka Nzambi mpe Moise, ba bandaka na kutambula na lweka mosi mpe yankaka. Bampasi kotaka. Ya kieleka.

¹⁶⁴ Beto ke bikala na Ndinga, mpe Ndinga ke sala bidimbu. Yesu tubaka, “Bidimbu yayi ke landa bayina ke kwikila Ndinga.” Beno me mona, ya ke vwanda na . . . Beno bikala na Ndinga, Ndinga ke sala bidimbu. Kasi, Moise, yinki yandi salaka?

¹⁶⁵ Ba me basika na nzila, mpe yinki ba salaka? Ba basikaka na nzila, mpe ba zimbisaka ya kibumbulu ya bawu ya masa.

¹⁶⁶ Mu banza yawu yina dibuundu me sala bubu yayi. Ya me basika na nzila ya Masonuku. Ba me basika na nzila samu na basisme. Ba me basika na nzila samu na mwa bima yina ba lendaka sala ve. Ba me ndima bima yango. Ba me ndima bima mutindu Lukwikilu ya Bantumwa. Wapi sika beno me mona yawu na kati ya Biblia? Ba me ndima catéchisme yina ba ke tanga. Ba me ndima ba-denomination na kisika ya nzingulu. Ba me ndima kupesa mbote na kisika ya nzingulu ya kubutuka mbala ya zole. Ba me ndima kumwangisa masa na kisika ya masa ya mbotika. Ba me ndima mutindu ya diabulu, “Tata, Mwana, mpe Mpeve-Santu,” na yina ya kele ve na kima ya mutindu yina na kati ya Biblia. Biblia me tuba, “Na Nkumbu ya Yesu Klisto!” Ya kele kaka na kima mosi ya kusala kana beno zola Masa yina mosi, beno vutuka diaka na nzila. Beno vutuka na . . . Yandi me kwenda ve; Yandi kele kaka awa. Beno ke baka ba-credo na kisika ya Klisto. Beno ke waya-waya na ba-caprice.

¹⁶⁷ Mosi ke tuba, “Mbote, mu kele Methodiste.”

Yina yankaka ke tuba, “Mu kele Baptiste.”

Yina ke talisa ti beno kele ve Muklisto, na ntangu yina. Beto kele ya Klisto! Beto kele ya Yandi.

Beno ke tuba, “Mbote, kana, munu, Baptiste?”

Kana yawu yina kaka beno kele, na yina beno kele ve ya Klisto, beno kele Baptiste.

Beno ke tuba, “Mbote, mu kele Pentecotiste.”

Kana beno kele kaka Pentecotiste na nzila ya denomination, yawu yina kaka beno kele.

168 Kasi, kana beno kele na nzingulu ya pentecote! Mpe Ndinga ya pentecote ke basisa nzingulu ya pentecote! Beno landa kima yina bilandi yina salaka, kubikala kuna tii kuna beno ke fuluka na Mpeve-Santu.

169 Na yina kana yina beno kele na yawu me swaswana na Ndinga, mpeve yina na kati ya beno me swaswana na yina Ndinga me tuba, na yina ya kele ve Mpeve-Santu. Ya kele diabulu ke mekula Mpeve-Santu. Beno me mona kisika beto ke zaba yawu? Oh, bayankaka na kati ya beto me tuba bandinga ya malu-malu, beto me boka bampova mpe bima ya mutindu yina, mpe me manga bima yayi yankaka. Beto me tesa bima nionso yina vwandaka ve na kati ya Masonuku samu na kukwisa na yinzo-Nzambi. Wapi kisika beto me kuma bubu yayi? Beto me vutuka na ntoto ya kuyuma yankaka, organisation ya kuyuma. Beto salaka organisation, mpe beto me zimbisa Masa ya beto. Yawu yina kieleka Pentecote salaka. Ntangu ya ke banda na kusala organisation, ya ke banda na kubuka ngwisani, mpe ke tuba, “Mbote, ntangu yayi beto ke vukana ve, kana bakala yayi ke kwikila ve *yayi*.”

170 Kwenda na ntuala, vwanda na yandi tii yandi ke kuma na Ndinga ya Kieleka, luzabu ya Kieleka. Nionso yina ya kele, beno bika yawu kwenda, na mutindu nionso. Beno kwenda na ntuala, beno vwanda bampangi.

171 Kasi, oh, beto salaka organisation, mpe tubaka, “Mbote, samu nge kele ve Unitaire, samu nge kele ve Binitaire, to Trinitaire, to mutindu *yayi*, beto ke vwanda ve na ngwisani na nge.” Na yina ntangu beto ke sala yina, yinki beto ke sala? Beto ke vutuka diaka beto mosi na ntoto ya kuyuma. Ya kieleka!

172 Kasi, beno bambuka moyo, ntangu Israel basikaka na nzila, nzila ya yinsi ya nsilulu, Ditadi bikaka bawu ata fioti ve; Ya vwandaka kaka kuna, masa salaka mutindu mosi. Na yina Mpeve-Santu, kele kaka kuna. Beto fwanda vutuka ve na manima.

173 Ntangu yayi, awa Nzambi ke longa beto kima ya nene. Nzambi ke longa beto awa dilongi mosi. Ba bulaka Klisto mbala mosi, na kupesaka beto nzingulu ya pentecote, na ntangu mosi, samu na bantu nionso. Ntangu yayi, ntangu ba bulaka Ditadi yina, ba zolaka bula Yawu diaka ve. Ba bulaka Yawu kaka mbala mosi.

174 Moise salaka kifu ya kubula Yawu mbala ya zole, samu na kutalisa kulemba ya lukwikilu ya yandi na Mulemvo. Kasi ntangu ba bulaka Klisto mbala mosi, beto zaba ti ba ke bula Yandi diaka ve. Mbote, yinki Moise vwandaka sala? Moise vwandaka tula kima mosi ya malu-malu, kumeka kusala kima ya malu-malu.

175 Mpe ya kele mutindu yina banganga-Nzambi ya beto me sala bubu yayi. Ba me meka na kusala kima ya malu-malu. “Beto

ke kuma ba-Assemblée de Dieu. Beto ke kuma Dibuundu ya Nzambi ya Pentecote. Beto ke kuma Conseil Général. Beto ke kuma *yayi, yina, to yankaka.*” Yawu yina ve Nzambi salaka. Yina vwandaka ve dibanza ya Yandi.

¹⁷⁶ Ba bulaka Klisto mbala mosi. Yina kele nzingulu ya kieleka. Yina kele nzila ya kieleka. Na Kilumbu ya Pentecote, Pierre tubaka, “Beno balula ntima, beno nionso, mpe beno baka mbotika na Nkumbu ya Yesu Klisto.”

¹⁷⁷ “Beto ke mwangisa masa na nkumbu ya ‘Tata, Mwana, Mpeve-Santu,’ beto ke ba-credo ya mutindu nionso mpe bima yankaka nionso samu na Yawu.” Ntangu beto ke bika Ndinga, kuyituka ve beto lenda kuma kisika mosi ve. Beno me mona?

¹⁷⁸ Nzambi ke longa beto dilongi mosi. Moise banzaka ve na kutuba, “Ntangu yayi beto ke banda kima ya malu-malu awa ntangu yayi, mpe beto ke sala organisation mpe beto ke sala dibuundu ya Catholique.” Yawu yina kima ya ntete bawu salaka. Ve, na yina na manima ya mwa ntangu fioti, “Mbote, beto ke banda kima ya malu-malu na yina, beto ke sala ba-Luthérien.” Na manima ba-Anglicane, na manima ba-Baptiste, mpe yina yankaka, mpe ba-Campbellites mpe Dibuundu ya Klisto, mpe mbeni ya Klisto, mpe bima yankaka nionso. Beno me mona, bawu nionso bandaka na kukwenda, mosi na manima yankaka, mosi na manima yankaka, na kusalaka ba-denomination mpe ba-organisation. Ya vwandaka yina ve. Beno me mona kuna yina ba ke na kusalaka? Ba ke na kubula diaka Ditadi, samu na kubanda kima mosi ya malu-malu. Beto ke na nsatu ya malongi ya malu-malu ve.

¹⁷⁹ Muntu nionso na kati ya Biblia bakaka mbotika na Nkumbu ya Yesu Klisto. Muntu nionso na kati ya Biblia yina kuzwaka Mpeve-Santu, kwisaka na nzila ya Nzambi, kieleka nzila yina Nzambi siamisaka ya ke vwanda. Ba salaka kima mosi. Ba vwandaka na nzingulu ya mutindu mosi. Bidimbu ya mutindu mosi vwandaka landa bawu. Bisalu ya mutindu mosi vwandaka landa bawu. Samu na yinki? Ba vwandaka zinga pene-pene ya Ditadi. Ba vwandaka na Masa mosi.

¹⁸⁰ Mpe, bubu yayi, beto kele na ba-credo mingi mpe ba-denomination mingi, samu beto me banda kima ya malu-malu. Beto ke na nsatu ya kima ya malu-malu ve. Beno vutuka!

¹⁸¹ Moise zolaka ve kubula diaka Ditadi, kubanda kima ya malu-malu. Yandi zolaka tuba na bawu, samu na Ditadi ya kieleka. Oh, mu banza beno me simba yawu! Moise zolaka tuba na Ditadi ya kieleka, yina ba bulaka; ya kele ve kumeka kubula Yawu diaka, ya kele ve kumeka kubanda kima ya malu-malu, kasi kutuba na Kima ya ntama!

¹⁸² Nzambi, sadisa munu! Kana mu kufwa mputu, na chaire, mu ke tubila Ditadi ya kieleka! Mu ke tubila nzingulu ya kieleka. Mu ke tubila Masonuku ya kieleka yina pesaka bawu mbotika

ya Mpeve-Santu, “Beno balula bantima ya beno, beno nionso, mpe beno baka mbotika na Nkumbu ya Yesu Klisto samu na mulemvo ya masumu, mpe beno ke kuzwa dikabu ya Mpeve-Santu.” Mwandulu ya ntangu nionso ya yinto ya Bamasa yina ke basika na Ditadi kele kaka na beto. Ya ke basisa kima yina mosi. Ya ke basisa ba-vision. Ya ke basisa bakubeluka ya nzutu. Ya ke basisa baprofesi. Ya ke basisa bima nionso yina bawu salaka.

¹⁸³ Ntangu Israel vutukaka diaka na kati ya Masonuku, mpe vutukaka na nzila, bawu kwendaka na yinsi ya nsilulu. Kasi yina bakaka bawu bamvula makumi yiya.

¹⁸⁴ Pentecote me vwanda pene ya bamvula makumi yiya to makumi tanu, na kuwaya-wayana na kati ya ntoto ya kuyuma. Beno vutuka na Ditadi! Ya ke monana pwelele. Yawu yayi awa, ya me sonama kaka awa na Ndinga. Mpeve-Santu kele awa na kusalaka kima mosi yina Yandi vwandaka sala, na yina Mwandulu ya ntangu nionso ya Masa kele awa. Beno vutukaka kaka na Yawu, beno vutuka na yina ya ntama, ya kieleka. Wapi mutindu ya vwandaka na kati ya kieleka?

¹⁸⁵ “Mbote, ba vwandaka pesa mbote na longi”? Kima ya mutindu yina ve. “Ba bakaka mbotika na nkumbu ya “Tata, Mwana, Mpeve-Santu”? Ya kele ve na kima ya mutindu yina. Ya kele ve na muntu mosi na kati ya Biblia, kisika mosi ve, to (na nganda ya bamvula bankama tatu) na nganda ya Biblia, yina bakaka mbotika na nkumbu ya “Tata, Mwana, Mpeve-Santu.” Yina kele credo ya Catholique, ya kele ve malongi ya Biblia. Beno me mona?

¹⁸⁶ Ba vwandaka na Mpeve-Santu. Bidimbu yayi vwandaka landa yina kwikilaka. Ya ke sala yawu diaka bubu yayi. Ditadi yina kele kaka ya moyo ntangu nionso mutindu ya vwandaka, Ditadi yina ba bulaka!

¹⁸⁷ Beto tuba ve, “Mbote, ntangu yayi beno kwisa kuna mpe beno kota na dibuundu ya beto ya Pentecote, beno kota na ba-domaine ya beto ba-Pentecotiste.” “Ve, beno kwisa kuna mpe beno kuma Baptiste, to Methodiste, to Presbytérien, to Catholique.” Yinki yina? Yina kele kubula Ditadi kuna diaka, kumeka na kubanda kima ya malu-malu.

¹⁸⁸ Beno tuba na bawu, “Beno balula ntima, mpe beno baka mbotika na Nkumbu ya Yesu Klisto,” samu na mulemvo ya masumu ya beno, “mpe bidimbu yayi ke landa bayina ke kwikila.” Ntangu yayi beno vutuka na nzila, beno vutuka na Masa yina mosi. Masa yina mosi ke pesa madidi ya mutindu mosi. Ya ke pesa fimbu ya mutindu mosi na nzutu. Ya ke pesa ngolo yina ke sukulaka ya mutindu mosi. Ya ke pesa ngolo ya kubeluka ya nzutu ya mutindu mosi. Ya ke sala kima ya mutindu mosi Yawu salaka kuna, kana beto ke vutuka kaka na Mpeve yina mosi.

¹⁸⁹ Luzingu na kati ya yinti ya vinu ke basisa bambuma ya vinu. Kana ya salaka yawu na mvula me luta, ya ke sala kima mosi na mvula yayi. Yina kele musiku ya Nzambi. Musiku ya Nzambi kele yina, kana yayi kele yinti ya vinu, ya ke buta bambuma ya vinu. Beno lendaka vukisa yawu na kima yankaka, kasi kana beno bika yawu swi mpe ya ke vutuka kaka na bambuma ya vinu yina diaka.

¹⁹⁰ Na yina beto me vukisa dibuundu na Pentecotisme, na Baptistisme, na Methodistisme, na Presbytérianisme, na—na Anglicanisme, mpe mutindu yankaka nionso ya isme. Samu na yinki beno ke bika yawu swi ve? Beno vutuka na Vinu, ya ke vutuka na Ngolo yina mosi. Amen! Amen! Mu ke zolaka yawu.

¹⁹¹ “Kubanda kima ya malu-malu.” Kima ya mutindu mosi beto me sala. Samu na kumeka kutalisa ve kiyeka ya beto. “Docteur *Kingandi* kele mubandisi ya dibuundu ya nene *Kingandi* ya *kingandi-mpe-kingandi*.” Ya vwandaka mutindu yina ve.

¹⁹² Yawu yina Moise tubaka, “Mu ke talisa na bawu yina mu lendaka sala. Mu ke sala yawu, na mutindu nionso!” Yandi bulaka Yawu, yawu kwisaka ve. Yandi nganaka diaka, “Mu ke talisa yina mu lendaka sala!” Nzambi pesaka yandi kitumbu samu na yawu.

¹⁹³ Nge ke banza ve, kana nge “kangama kaka na mwa denomination.” Nzambi ke pesa beno kitumbu samu na yawu. Yina kele kaka kieleka. Beno fwana vutuka na yina ya kieleka. Beno vutuka.

¹⁹⁴ Beno tuba kaka na bantu. (Beno tuba na bawu ve, “Beno kwisa kota na dibuundu ya beto. Beno kwisa tuba credo ya beto.”) “Beno vutuka mpe beno balula bantima, mpe beno baka mbotika na Nkumbu ya Yesu Klisto, samu na mulemvo ya masumu ya beno; mpe beno ke kuzwa dikabu ya Mpeve-Santu, kana ntima ya beno kele ya kusungama. Mpe bidimbu yayi ke landa bakwikidi. Kimvuka ya bakwikidi, bidimbu yayi ke tambula na bawu.” Samu na yinki? Ditadi, Ditadi yina ba bulaka mpe Bamasa ya Yandi ya Luzindu ke basika, na kusalaka kima mosi yina Yandi salaka kuna. Ya lenda kaka kusadisa yawu ve. Oh, yinga.

¹⁹⁵ Beto zola kukitalisa, mpe beto ke tuba, “Beto kele Methodiste, mpe Baptiste.”

¹⁹⁶ Beno tuba kaka na Ditadi, Yandi kele Mvwandulu ya ntangu nionso. Beno meka ve na kukota na Yawu. Mu me “kotaka” awa. Beno meka ve na kukota na Yawu. Beno lenda ve kukota na Yayi, yina kele kaka kima mosi kieleka. Beno lenda kota na ba-Methodiste, beno lenda kota na ba-Baptiste, beno lenda kota na ba-Pentecotiste, beno lenda kota na ba-Anglicane, kasi beno lenda kota ve na Yayi. Ve. Beno fwana vwanda ya kufuluka na Yayi. Beno kota na Yawu ve; beno vwanda ya kufuluka na Yawu. Yawu yina kaka. Ya me fuluka na yinki? Ya me fuluka na Ngolo,

ya me fuluka na Mpeve, ya me fuluka na Luzingu, ya me fuluka na kiese, ngemba, ntima ya yinda, lutondo, mambote, Ngolo ya Mpeve-Santu na kati ya luzingu ya beno, samu Mvwandulu ya kukonda nsuka kele kuna. Beno bambuka moyo.

Mu fwana sukisa samu ntangu me luta.

¹⁹⁷ Kasi, beno bambuka moyo, Ditadi yina bikaka bawu ata fioti ve. Ya lendaka bika bawu ata fioti ve. Mpe Klisto ke bika beto ata fioti ve; Klisto tubaka, “Mu ke vwanda na beno ntangu nionso, tii na nsuka ya yinza.” Yina kele kieleka? Mpe Ditadi yina vwandaka na bawu bisika nionso kubanda Horeb tii na Nebo. Ya salaka yawu. Kuna na Jourdain, Ya vwandaka kaka kuna. O Nzambi, mu ke zola kumona Yawu na Jourdain!

¹⁹⁸ Moise, ntangu yandi vwandaka na Jourdain, Ditadi vwandaka na yandi bisika nionso. Mpe yandi vwandaka ya kutelama na zulu kuna, ke tala na nsi kuna na nkonga ya bantu yina me vutuka na manima mpe me kwenda ntama na Nzambi. Ntima ya yandi vwandaka nionga samu na bawu. Mpe yandi talaka kuna na Jourdain. Ya vwandaka kuna na Jourdain. Jourdain, ya kimpeve, mu ke tubila. Mpe ya vwandaka me telama kuna, lufwa vwandaka kwisa pene-pene ya yandi. Kasi yandi talaka, yandi tandamaka kuna na lweka ya yandi mpe Ditadi vwandaka kuna. Yandi kwendaka kuna na zulu ya Ditadi, mpe Bawanzio kwisaka, ba nataka yandi.

¹⁹⁹ “Mu ke bika beno ata fioti ve to mu ke yambula beno ve.” Ata yinki mutindu bantangu ke kuma mpasi, wapi mutindu beto ke kuma biboba, konso lufwa yina beto ke kufwa, beno bambuka moyo, Ditadi ke vwanda kuna na Jourdain. Mu ke bika beno ata fioti ve to Mu ke yambula beno ata fioti ve. Beno bambuka kaka moyo na yawu. Mvwandulu ya Masa ya ntangu nionso ya Ditadi ke vwanda na beto na luzingu ya beto nionso, mpe kuna na Jourdain.

²⁰⁰ Beto kulumusa bayintu ya beto. [Mpangi mosi ya bakala ke pesa mwa ndongosolo—Mu.]

²⁰¹ Ntangu Mpeve yina ke tambula na kati-kati ya beto, Mpe ya Nzambi ke tambula na kati-kati ya beto, ya lendaka vwanda na bayina awa na suka yayi yina me zaba ve Klisto, mpe beno kele—beno kele ve pene-pene ya Ditadi yina, beno kele ve na kutuba na ngwisani na Yawu na suka yayi? Kasi beno zaba ti Ya kele awa. Beno tala Yawu ke sala bisika nionso, beno tala Yandi ke tambula bisika nionso, beno tala Yawu ke tambula na zulu ya bantu. Yina kele Mvwandulu ya Masa ya ntangu nionso. Yina kele mpulusu. Yina kele Mpeve yina ke tambwisa bambungu ya bawu na kisika mosi ti ba lendaka ve kusimba ngemba ya bawu ntangu ya yinda ve, kima mosi me basika. Mpe beno me zaba Yandi ve, beno lenda telemisa diboko ya beno mpe kutuba, “Sambila samu na munu, Mpangi Branham. Mu ke zola ntangu yayi kuzaba Yandi. Mpe mu ke zola kutuba na Yandi, mpe mu ke zola kuzaba Yandi mutindu

muvimba ya Mpeve ya Yandi. Mu ke zola zaba ti Yandi kele kaka pene-pene ya munu, ntangu nionso. Mu ke kwikila Yandi kele. Kasi mu ke zola kuvwanda na ngwisani. Mpe mu ke na mpwila, mpe mu kele na nzala ya Nzambi. Mu ke zola zaba Yandi mbote mingi”?

²⁰² Nzambi sakumuna nge, tata. Mpe Nzambi sakumuna nge, tata. Mpe nge, mpangi-bakala. Nge, yinga, kuna na manima. Na nsi awa, mama, yinga. Yinga, mama. Beto ke mona maboko ya nge, mpe Nzambi me mona yawu. Nzambi sakumuna nge, bakala ya ntwenia. Nzambi sakumuna nge. Mpe nge, mama. Amen. Nzambi sakumuna nge. Nzambi sakumuna nge, mpangi-kento. Muntu yankaka ntangu yayi, na ntangu ya pima. Nzambi sakumuna nge, kuna na manima, mpangi ya ntwenia.

²⁰³ Beno banza yawu. Beno banza yawu, Mvwandulu ya Masa ya ntangu nionso ya Ditadi, Mpeve yina mosi; ti Yandi bokaka kuna na kilumbu ya lusambusu ya Yandi, ntangu Yandi bakaka lusambusu ya beto. Mpe nkawa ya Nzambi ya nganzi ya ngolo kubwaka na zulu ya Yandi, mpe masumu ya beno vwandaka me ziunga na nkawa yina, mpe bulaka Yandi, mpe Menga ya Yandi mpe masa basikaka na Yandi. Yandi tubaka, “Tata, na maboko ya Nge Mu ke pesa Mpeve ya Munu.” Mpe Kilumbu ya Pentecote, Ya kwisaka samu na kukwenda na beto na nzietolo. Mpe Ya kele pene-pene mingi ntangu yayi.

²⁰⁴ Beno zola kutuba, “Mu vwandaka yenga-yenga ntama na yinzo, Mfumu, mu me vutuka na yinzo”? Ntangu beto ke yimbila, kana beno zola kwisa na autel mpe kukikaba diaka, mpe, samu na moyo ya beno, na Klisto? Amen.

Mu me yenga-yenga ntama na Nzambi, (Na ngaanda ya nzila.)

Ntangu yayi mu me vutuka na yinzo;

Nzila ya (Kukondwa lukwikilu, beno zaba.) mu me tambula yawu mingi,

Mfumu, mu me vutuka na yinzo.

Mu me vutuka na yinzo, mu me vutuka na yinzo,

Samu na kuyenga-yenga diaka ve;

Zibula maboko ya Nge ya nene ya zola,

Ntangu yayi, Mfumu, mu me vutuka na yinzo.

²⁰⁵ [Mpangi Branham ke na kuniunguta, *Mfumu, Mu Me Vutuka Na Yinzo*—Mu.]

²⁰⁶ Bana-babakala tatu ya fioti me kwenda kaka kuna, na nswalu nionso, na masa ya meso na meso ya bawu, ba me fukama na lweka ya autel. Samu, ba me lemvočila bawu. Ba lemvočilaka bawu ntwala bawu bika mpe bakiti ya bawu, ntangu mwa butomfu ya bawu salamaka. Ba me kwisa kaka na ntwala mpe ba me fukama awa, samu bantu kuzaba ti, yinki lweka bawu kele, na suka yayi.

207 Mu ke banza ti ya ke vwanda na mwa biboba yina ke zola kusala yayi, yina ke zola kaka kufukama, mpe kutuba, “Mfumu, mu—mu me yenga-yenga ntama na nzila. Mu me vwanda na ntembe mingi, mpe na bantangu yankaka mu me yenga-yenga mpe mu me kota na disumu. Ntangu yayi mu—mu ke zola vutuka na ntwala ya vwanda ntangu me luta mingi. Nzambi, mu—mu ke zola kwisa. Mu ke zola kieleka kukwisa mpe kufukama.” Amen.

208 Ntangu yayi, bana-bakento tatu ya fioti ya Arthur Beam, ya yinda mutindu mosi, ba me kwisa awa, ba me fukama.

209 Na kukwendaka na ntwala ya kele mwana-kento ya fioti yina me kuzwa mpangi-bakala ya malu-malu na yinzo. Kilumbu yina mu vwandaka ya kuvwanda; Mama Wood kwisaka mpe tubaka na munu, yandi tubaka mpangi-kento yayi ke zola kwenda na lupitalu samu na kuzwa bébé. Mpeve-Santu tubaka, “Kwenda tuba na bawu ya ke vwanda mwana-bakala.” Ntangu yandi butukaka, ya vwandaka mwana-bakala ya fioti.

210 Ya ke monana ya kele bana na suka yayi, bana ya fioti me basika na mwa kalasi ya Mpangi-kento Arnold, samu na kukaba baluzingu ya bawu. Autel ya muvimba, na diboko ya munu ya kibakala, kele ya kufuluka na bana ya fioti.

211 Ya ke vwanda mbote kana beto ke yimbila nkunga mosi, na autel, mpe bantu yankaka, bakuluntu.

Ntangu yayi, Mfumu, mu me vutuka na yinzo.

Mu me vutuka . . . (. . . ? . . .)

Samu na yenga-yenga diaka ve;

Zibula maboko ya Nge ya nene ya zola,

Ntangu yayi, Mfumu, mu me vutuka na yinzo.

212 Beto kulumusa bayintu ya beto na mwa ntangu fioti, samu na kisambu, samu na mwa bana yayi ya fioti.

213 Tata ya Mazulu, kana ya kele na mbasi mosi, kana Yesu ke sukinina samu na bamvula kumi to kumi na tanu, yayi ke vwanda bana-babakala mpe bana-bakento yina ke nata Nsangu yayi na bansungi yankaka ke kwisa. Na ntembe ve na mabanza ya munu, Mfumu, kasi yina bilumbu nionso ya luzingu ya bawu ba ke bambuka moyo na kukwisa na autel yayi. Mpe ba kele mwa mayaka, Mfumu. Mwa bantima ya bawu ya ntwenia mpe lembami me fundisama na suka yayi. Ya kele ve ti na kuwa Nsangu nionso; ba me basika kaka na kivinga, na kuwa Mpangi ya beto ya kento Arnold ke tuba; ba me kwisa pene-pene ya autel awa, samu na kupesa mwa baluzingu ya bawu na Nge.

214 Ntangu yayi, Tata, mu vwandaka tuba kaka ti na kati ya beto me vwanda Mpeve-Santu. Mpe Mpeve-Santu yayi, lukwikilu na Mpeve yayi, ke sala bima nionso. Mpe mu ke kwikila ti na ngunga kaka, Nge ke lemvokila konso disumu yina ba me sala. Mpe mu ke lomba Nge, na lukwikilu nionso yina kele na kati ya ntima ya

munu, ti Nge ke bumba mwa baluzingu ya bawu na kati ya nzila. Bika bawu kwenda ata fioti ve ntama na Nzila.

²¹⁵ Yayi kieleka kele diambu ya ngitukulu. Mpeve me tuba na suka yayi, beto ke “mona kima mosi ya ngitukulu.” Nzambi, kana Nge me bika kusala na bayankaka, baka bana ya fioti. Wapi mutindu na suka yayi, na lubokilu ya autel, ya kele ve na kuluntu mosi, kasi kimvuka ya muvimba ya bana ya fioti me kwisa. Kasi, ya me vwanda Nsangu ya nene ya lubakusu ya ngolo, mpe samu na bakuluntu, kasi bana me simba Mpeve ya Yawu. Beto ke tonda Nge samu na bawu, Tata. Mu ke pesa bawu na Nge, mutindu kisadi ya Nge, mutindu ba-trophée ya lukutakanu yayi; samu, na kubambuka moyo ti Mvwandulu ya Masa ya ntangu nionso ya Luzingu ke basika na bawu ntangu nionso ba ke zinga. Bika bawu vwanda na lukwikilu ntangu yayi na yina ke na kusalama, ti Nzambi yina me benda bawu na kiti mpe me fidisa bawu awa, bika bawu vwanda na lukwikilu na Nzambi yina bilumbu nionso ya luzingu ya bawu. Bika mwa bampeve ya bawu kukwisa na Nge na kilumbu ya lufwa ya bawu; ya vutuka na nzutu ya bawu na kilumbu ya mvumbukulu. Ba kele ya Nge, Tata. Beto ke pesa bawu na Nge na Nkumbu ya Yesu.

²¹⁶ Na yina beto me kulumusa bayintu ya beto. Mu ke yufula bana yayi nionso ya fioti na autel, yina ke kwikila ti Yesu kele Mvulusi ya beno mpe Mosi Yina me tuba na beno, na manima kuna na kati ya nkonga ya bantu, na kukwisa awa mpe kufukama pene-pene ya autel yayi. Beno ke kwikila ti Yesu ke zolaka beno mpe ke lemvokila disumu ya beno? Mu ke zola beno nionso kutelama mpe beno tala na manima awa na nkonga ya bantu. Yayi, ya kele mutindu yayi beno lenda tuba na bantu ti beno ke kwikila ti Yesu me vulusa beno. Ntangu yayi beno telama, ya kele mbote, mpe beno tala na manima kuna na nkonga ya bantu. Beno nionso bana-babakala ya fioti mpe bana-bakento yina ke zolaka Yesu, beno telama mpe beno tala na dibuundu kuna, beno nionso.

²¹⁷ Yinki samu na beno bana-bakento ya fioti awa na ntwala? Beno ke kwikila? Beno ke zolaka Yesu? Bana-bakento yayi ya fioti awa, beno ke zolaka Yesu na ntima ya beno ya muvimba? Beno ke kwikila? Beno ke zolaka Yandi? Beno ke zolaka Yandi, cherie? Beno telama awa, bika ti bantu kuzaba ti beno ke zolaka Yesu. Nzambi sakumuna beno.

²¹⁸ Ntangu yayi beto baluka mutindu yayi mpe beto yimbila samu na bantu yayi na ntwala beto kwenda, “Yesu ke zolaka munu! Mu zaba yawu, Biblia me tuba na munu mutindu yina.” Beno me mona? Beto telemisa maboko ya beto na ntangu beto ke yimbila ntangu yayi. Mbote mingi, beto yimbila yawu.

Yesu ke zolaka munu! Mu zaba yawu,
Samu Biblia me tuba na munu mutindu yina;

Bana ya fioti kele ya Yandi,
Ba kele ya kulemba . . .

219 Ntangu yayi na maboko ya beno na zulu . . . ? . . . Beto nionso:

Yinga, Yesu ke zolaka munu,
Yinga, Yesu ke zolaka munu,
Yinga, Yesu ke zolaka munu,
Biblia me tuba na munu mutindu yina.

220 Ntangu yayi beno nionso kuvutukila bandinga na manima ya munu: Mu ke kwikila Yesu Klisto kele Mwana ya Nzambi. Bubu yayi, mu ke ndima Yandi mutindu Mvulusi ya munu mosi. Kubanda bubu yayi, tii kuna, mu ke zolaka Yandi mpe ke sadila Yandi. Amen.

221 [Mpangi Ben Bryant me tuba, “Mpangi Branham, mu kele na bana yiya na zulu ya ntima ya munu na ntangu yayi. Nge zola na lemvo ya nge kusambila samu na bawu?”—Mu.] Ya kieleka mu zola, Mpangi Ben.

222 Tata ya Mazulu, bakala yayi me mona ti bana yankaka ya fioti ke kwisa na Klisto, mpe yandi me boka, mutindu tata, samu na bana ya yandi mosi. Mpe Mpeve yina me nata bana yayi ya fioti na autel, bika ti Mpeve mosi yina kuvulusa bana ya yandi, Mfumu. Pesa yawu. Beto ke pesa bawu na Nge, Tata, na Nkumbu ya Yesu Klisto.

223 Ntangu yayi mutindu beno bana ya fioti ke vutuka na bisika ya beno, mu ke zola muntu nionso kuna na ndonga kupesa mbote na bana yayi ya fioti, to beno simba bawu mutindu ba ke vutuka. Beno nionso kuvutuka na bisika ya beno, mutindu *yayi*. Mpe bika ti muntu nionso kuna kusimba kaka bana yayi ya fioti. Mpe beto zola beno na bantima ya beto nionso. Beno kele bamambele ya Nzutu ya Klisto, kaka mutindu na kati ya Yawu mutindu beto nionso.

Beto ke kwenda na Sion,
Ya kitoko, Sion ya kitoko;
Beto ke kwenda na Sion,
Mbanza ya Nzambi ya kitoko.

Beno kwisa, beto yina ke zolaka Mfumu,
Mpe beto talisa kiese ya beto,
Beto vukana na nkunga na ngwisani ya mbote,
Beto vukana na nkunga na ngwisani ya mbote,
Mpe beto ziunga Kiti ya kimfumu,
Mpe beto ziunga . . .

Ya kele nkunga ya kitoko mingi! Beto telemisa maboko ya beto na zulu ntangu yayi.

Beto ke kwenda na Sion,
Ya kitoko, Sion ya kitoko;
Beto ke mata na Sion,
Mbanza ya Nzambi ya kitoko.

Beto pesana mbote mosi na yankaka ntangu beto ke yimbila ntangu yayi.

Beto ke kwenda na Sion,
Ya kitoko, Sion ya kitoko;
Beto ke mata na Sion,
Mbanza ya Nzambi ya kitoko.

²²⁴ Ntangu yayi beto telama na bayintu ya beto ya kukulumusa, ntangu beto . . . Bula yawu Mpangi Teddy, kaka . . .

²²⁵ Mu kele na mwa balombilu awa, mpe bamuswale mpe nionso yina. Ya lendaka katuka na bayinsi ya nzenza. Billy vwandaka tuba na munu ti ba vwandaka na mwa baboti ya bébé mosi ya fioti ya Angleterre, pene ya yinda mutindu *yayi*, mwana yango kele ya muvimba kikata. Mpe na yina beto fwana sambila samu na yawu, diaka.

²²⁶ Mpe na yina . . . [Mpangi Ben Bryant me tuba, “Mpangi Branham, lemvokila munu samu me zenga nge ndinga, kasi sambila ti, yina tutaka tomabilu ya beto mazono na nkokila, na garde-boue ya munu ya diboko ya kibakala, sambila ti yina zabana. Sambila ti Mfumu kutalisa yawu.”—Mu.] Amen, Mpangi Ben, ya kieleka mu ke sala yawu. [Mpangi Branham ke na kuniunguta, *Beto Ke Kwenda Na Sion.*]

²²⁷ Mutindu beto ke kwenda, Mfumu, beto zaba ti Ditadi yina ba bulaka kele kaka pene-pene ya beto, Mvwandulu ya Masa ya ntangu nionso ya Ditadi ke tambula na Dibuundu. O Nzambi ya Kukonda nsuka, pesa na beto, na suka yayi, lukwikilu na Nzambi yayi kele na beto. Mu zaba ti Nge ke sala yawu, kaka mutindu beto lenda kuzwa lemvo na Nge, ti Nge lenda tula kivuvu na beto na Yawu. Kana Nge ke pesa Yawu na beto na mutindu ya kufulukaka, beto lenda sadila Yawu mbote ve, Mfumu. Kasi kana beto me kuzwa lemvo na Nge, bika yawu salama.

²²⁸ Mpangi ya beto ya bakala me tuba ti muntu mosi bulaka tomabilu ya yandi. O Nzambi, beto zaba ti bakala yango kele na mbongo ve samu na kusala bima yayi. Mu ke sambila ti Nge ke nata muntu yango na nsi ya kundima, to kima mosi, yandi lendaka balula ntima na kusalaka mutindu yayi, kukwisa, kutuba, “Mpangi, mu ke yidika tomabilu ya nge, mu ke sala yawu.” Sadisa Mpangi Ben mpe bankundi ya yandi ya luzolo.

²²⁹ Awa na diboko ya munu kele bamuswale mpe balombilu, yina ke na lukwikilu na Nzambi yina. Moise vwandaka na lukwikilu na Nzambi yina, mpe yandi zabukaka mubu. Daniel vwandaka na lukwikilu na Nzambi yina, mpe basisaka yandi na dibulu ya bankosi. Shadrack, Meshack, mpe Abednego, vwandaka na lukwikilu na Yandi, mpe fwaka tiya.

²³⁰ Paul vwandaka na lukwikilu na Yandi, mpe kilumbu mosi ntangu bisalu vwandaka kieleka mpasi mpe Paul lendaka ve kukuma na muntu nionso, yandi bakaka kaka muswale, yandi

tubaka, “Mu ke kwikila ti Nzambi kele na munu.” Yandi ntetikaka maboko ya yandi na zulu ya bamuswale mpe batablié, mpe bampeve ya yimbi basikaka na bantu, mpe bimbevo mpe maladi basikaka na bawu. Nzambi, mu ke na lukwikilu na Nzambi mosi yina. Bika diabulu kukwenda. Bimbevo, maladi, mpe bampasi, bika ti yawu kwenda, Mfumu.

²³¹ Nge kele Nzambi yina mosi tubaka na munu kuna na Dikunzi yina ya Tiya, kuna na nzadi. Nge kele Mosi yina kele na foto ya Nge ya kunamika awa na munu, na zulu ya kibaka. Nge kele na beto, Mfumu. Nge kele awa ntangu nionso, Dikunzi ya Tiya yina mosi. Mpe beto me sepela na Masa ya Ditadi konso kilumbu, mutindu beto ke vukana na Mpeve. Na yina, Nge kele awa. Beto ke tula kivuvu na Nge, Mfumu. Beto kele na lukwikilu na Nge. Beto ke kwikila ti Nge ke pakula beto mpe ke sadisa beto. Samu na nkembo ya beto ve, Mfumu; beto ke vwanda mutindu Moise na ntangu yina, ntangu yandi salaka kima ya yimbi. Beto zola sala kima mosi samu na kusadisa Nge, Mfumu. Yawu yina dibanza ya ntima ya beto, kusadisa Nge, kana beto lenda sala yawu. Nge ke talisa na beto, Tata, nionso yina Nge zola beto sala.

²³² Mpe ntangu yayi, na zulu ya kisalu ya lukwikilu, mu ke fundisa kimbevo yina bamuswale yayi ke talisa, mpe balombilu yayi. Ba ke bika bantu. Mu zaba ti Nge ke sala yawu, Mfumu. Mu ke kwikila yawu, na ntima ya munu, ti Nge ke sala yawu. Belusa bimbevo nionso na kati ya beto na suka yayi.

²³³ Vulusa bayina me telemisa maboko ya bawu, yina me tuba ti ba ke zola kwisa na Ditadi, samu na Masa. Nzambi, bika bawu vwanda na mpwila bubu yayi, bika ya vwanda kuna na luzingu ya mungwa pene-pene ya bawu, ti ya ke sala bawu vwanda na mpwila samu na Klisto. Pesa yawu.

²³⁴ Vwanda na beto na nkokila yayi, Tata. O Nzambi, bika mu zaba, na nzila ya balombilu yayi, yina kele na zulu ya bantima ya bantu. Kana ya kele ve na kima mosi na ntima ya bawu, na yina, Mfumu, Nge pesa munu kima mosi samu na kulonga bantima ya bawu na nkokila yayi.

²³⁵ Sakumuna Mpangi ya beto Neville, mpe kento ya yandi, dibuta ya yandi; mwa dibuundu ya beto, ba-administrateur ya beto, ba-diacre ya beto, ba-mambele ya beto. Mpe Nzutu ya Nge bisika nionso, vwanda na beto, Tata. Beto ke pesa yayi na maboko ya Nge, na Nkumbu ya Yesu Klisto.

. . . Sion;
Beto ke mata na Sion,
Mbanza ya Nzambi ya kitoko.

Ntangu yayi beto yimbila yawu, kieleka, ya kieleka na Yandi ntangu yayi. Beno me mona?

Beno kwisa, beto yina ke zola Mfumu,
Mpe beto talisa kiese ya beto,
Beto vukana na nkunga na ngwisani ya mbote,
Beto vukana na nkunga na ngwisani ya mbote,
Mpe beto ziunga Kiti ya kimfumu,
Mpe beto ziunga Kiti ya kimfumu.

Na bantima ya beto ya kukulumusa ntangu yayi.

Beto ke kwenda na Sion,
Ya kitoko, Sion ya kitoko;
Beto ke mata na Sion,
Mbanza ya Nzambi ya kitoko.



MASA KE BASIKA NTANGU NIONSO NA DITADI KNG61-0723M

(The Ever-Present Water From The Rock)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 23 ya Ngonda ya sambwadi, na mvula 1961, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org